

1

মর্মলেখা

শ্রীনিলিনীমোহন শাস্ত্রী



১৯৩৩

এন, এম, রায় চৌধুরী এণ্ড কোং
১১, কলেজ স্কোয়ার,
কলিকাতা।

প্রকাশক—

এন, এম, রায় চৌধুরী,

১১, কলেজ স্কোয়ার, কলিকাতা।

প্রিন্টার—শ্রীনারায়ণ চন্দ্র দাস

দি বেঙ্গল ইকনমিক্যাল প্রিন্টিং ওয়ার্কস্

১২, ক্লাইভ স্ট্রীট, কলিকাতা।



সাগর তুমি, তোমার কাছে বিন্দুবারি অর্ঘ্য আনি'
হে কবিগুরু, করিতে নতি আপন মনে সরম মানি ।
কিন্তু রবি-পরশে যবে আলোকে হাসে দিগঙ্গনা,
বিন্দুদানে রাজিয়া উঠে কমল দলে শিশির কণা ।

সূচী

বিষয়	পৃষ্ঠা
সূচনা	১
অশ্রুকাণ্ড	৩
প্রেমের শক্তি	১০
সম্মান রক্ষা	১৩
অপয়া	১৭
সন্ধ্যা প্রদীপ	৩৯
পাখীগণী	৪১
পাখীগণ রানী বা ব্যর্থ সুযোগ	৪৬
সাধু	৪৯
কি বেশে এলে ফিরে !	৬৩
মালিকরের একদিন	৭০
রূপ-কথা	৭৪
অভিষেক	৭৭
এ পারে	৮০
শেফালির অবতরণ	৮৩
নীরবে রহিল চেয়ে	৮৮
কল্পনা	৯০

বিষয়	পৃষ্ঠা
ডাক্‌ তারে ...	৯৮
জল কেন অঁখি কোণে ? ...	৯৯
উৎকণ্ঠিতা ...	১০১
এ পথে এলনা ফিরে ...	১০৪
আমার বনের মুক্ত হরিণটিরে ...	১০৬
শ্রীসতীশ চন্দ্র ঘটকের মহাপ্রয়াস ...	১০৭

আজ ত সন্ধ্যা আসিল ঘনায়ে,
 বৃথা আজ অভিমান,—
 শুষ্ক মাঠের রিক্ত এ বায়ে
 ঘুরে উদাসীন তান !
 আশা নিরাশার দিন নাই আর,
 সাথীরা আমার আঁধার নিশার,—
 হোক তোমাদের গোপন ভাষার
 ঝঙ্কার ঘরে ঘরে ।
 মর্ম্মের লেখা মর্ম্মের লেখা
 কর্ম্মের অবসরে ।



অশ্রু কণা

একদা নন্দনে শচী-সঙ্গ ছাড়ি দিয়া
ইন্দ্র যান দূরে ; শচী উঠেন কাঁদিয়া ।
সঙ্গে ছিল যক্ষ কন্যা—কহে ডাক ছাড়ি’
‘দেবতা বলিয়া কিগো সব বাড়াবাড়ি !
অইত চলেন উনি ; এত কি দুঃসহ
পরানে বাজিল ব্যথা—এত কি বিরহ ?
‘অহর্নিশ একসাথে উঠ, বস, জাগো,
ঘুমাও, বেড়াও, তবু তৃপ্ত নহ, মাগো,
অরুচিও হয় না কি ? কি কহিবে দাসী ?
এত বলি’ উচ্চকণ্ঠে উঠে বালা হাসি ।

সরোষে কহেন শচী—“আশঙ্কা এমনি
রহে দম্পতীর প্রেমে ! হা মূঢ় রমণি,
না রাখিলি তার মান হাসিলি হেলায় !
এই পাপে স্বর্গচ্যুতি—নিবাস ধরায়
অবশ্য ভুঞ্জিতে হবে ।”

বলিতে বলিতে
 সর্ব অঙ্গে দিব্য জ্যোতি লাগিল জ্বলিতে,
 লাবণ্যমণ্ডিত গণ্ডে ফুটিল গৌরব
 দীপ্ততেজে,—সচকিত দেবতা দানব !

নির্বাক বাসব ফিরি' দেখেন সম্মুখে
 নতজানু যক্ষকণ্ঠা ভীতিকম্প্র বুকে
 করিছে করুণাভিক্ষা ; কহেন ইন্দ্রাণী,—
 “মিথ্যা হইবার নহে দেবতার বাণী” ।
 তথাপি কোমল প্রাণ গলে করুণায়
 কহেন বাসবে চাহি করিতে উপায় ।

ইন্দ্র চিন্তি' ক্ষণকাল ক'ন স্মিতমুখে—
 “সর্বশ্রেষ্ঠ যে সামগ্রী ধরণীর বুকে
 যে দণ্ডে পশিবে ল'য়ে স্বর্গপুরদ্বারি
 সেই দণ্ডে শাপ মুক্ত হবে তুমি, নারি” ।

শুনিতে শুনিতে কথা হেরিলা বিস্ময়ে
 যক্ষকণ্ঠা, শচীশাপ মূর্তিমান্ হ'য়ে
 অগ্রসরি' স্বর্গ হ'তে খেদাইল তারে
 অধোদেশে ! উতরিলা বৈতরণী পারে ।

ব্রহ্ম বালা, ধৰাপৃষ্ঠে ঠেকিতে চরণ
 হেরিলা স্তূদূরে রুদ্ধ অমরা তোরণ !
 স্বৰ্গীয় রূপের ছটা মিলাইল গায়,
 নারী হ'য়ে যক্ষকণা বিরাজে ধরায় !

সেইদিন হ'তে বালা খুঁজে খুঁজে ফিরে
 পৰ্বতে, কন্দরে, বনে, গ্রামে, সিঙ্কনীরে
 শ্রেষ্ঠবস্ত্র ; মনোমত কিছুই না পায় ;
 বসন্তে মলয়ানিল লাগে আসি গায়,
 নবশোভা বিকশিত ধরণী উপরে,
 শ্রবণ জুড়ায়ে যায় পিক কলস্বরে,
 রসাল মুকুলগন্ধে অন্ধ অলিকুল
 মধুর গুঞ্জন তুলি' বনান্তে সঙ্কুল ;
 ইহাদের মাধুরীতে ভরি' লয়ে' ডালা
 স্বৰ্গদ্বারে পরীক্ষিতে উপনীতা বালা ;
 দৃঢ় রুদ্ধ পূৰ্ববৎ রহিল দুয়ার
 বিফল বাসনা বালা ফিরিলা আবার ।

খনির তিমিরগৰ্ভ হ'তে শ্ৰেষ্ঠ মণি
 বাছি' লয়ে পুনঃ তথা পশিলা রমণী ;
 উত্তালতরঙ্গময় সাগরের তল
 হ'তে ল'য়ে আসে কত মুক্তা ঢলঢল ;
 মধুর সুন্দর যাহা শ্রবনে, নয়নে,
 আত্মাণে, আত্মাদে, স্পর্শে পাইত ভুবনে
 আঁতি পাঁতি করি নিত, ফেলিতনা কভু ;
 খুলিলনা স্বর্গদ্বার কোনোমতে তবু।

কখনো বা নদীতটে শিবের মন্দিরে
 খুঁজে খুঁজে শ্রেষ্ঠদ্রব্য নারী যবে ফিরে,
 দেখে কোনো বিপ্রকণ্ঠা অর্ঘ্য ল'য়ে করে
 দেব পদ বন্দে মন্ত্রে প্রণত অন্তরে ;
 সেই অর্ঘ্য—সেই মন্ত্র তুলি' লয়ে আসে,
 হোম যজ্ঞ ক্রিয়াফল লইলা সকাশে,
 শক্তের লইলা শক্তি—রাজার গৌরব,
 ভক্তের লইলা ভক্তি—কুসুম সৌরভ,
 লইলা সাধুর পুণ্য—ঋষির সাধনা
 কোনোমতে স্বর্গদ্বার তবু খুলিল না।

এইরূপে বহুবর্ষ কাটিল বিফলে ;
 হতাশ হৃদয়ে নারী যা' পায় ভূতলে
 তাই ল'য়ে যায় স্বর্গদ্বারে ; হুড়ি নোড়া
 খড় কুটা কাঠ ধাতু ছেঁড়া ভাঙ্গা পোড়া
 ফেলেনা কিছুই আর,—বাড়ে আকুলতা ;
 ছয়ার তেমনি রুদ্ধ আগে ছিল যথা ।

একদিন বায়ুশিথল মধু সন্ধ্যাবেলা
 তৃতীয়ার শিশুচাঁদ করিতেছে খেলা
 নির্মল গগন-প্রান্তে যবে—স্বপ্নহারা
 দেবতার আঁখিসম ছ' একটি তারা
 যখন উঠেছে ফুটি'—ফিরেছে যখন
 করি' সারা দিনমান আহারাবেষণ
 ক্লান্ত বিহঙ্গম সুখে নীড়ে আপনার—
 গোষ্ঠ হ'তে ফিরিয়াছে গাভী, খুরে তার
 তুলি' ধূলি বাড়াইয়া সাক্ষ্য অন্ধকার—
 যবে দিনান্তের ক্ষীণ অক্ষুট আলোকে
 পরপারে ঝাউবন ঠেকে আসি' চোখে
 মুগ্ধ প্রকৃতির শ্যাম যবনিকা সম
 উর্দ্ধে লঘু, কৃষ্ণবর্ণ নিম্নে গাঢ়তম—

যক্ষকণ্ঠা ভ্রমিতে ভ্রমিতে নদীতীরে
 হেরিলা স্তিমিতালোক-মলিন কুটীরে
 ব্রাহ্মণ অশীতিপর সজল নয়নে
 মৃতপত্নী ল'য়ে কোলে ব'সে যোগাসনে
 বুকে তার যত ব্যথা—মুখে নাহি বাণী
 রয়েছে যেন কায়াহীন ছায়ামূর্তি খানি—
 নেত্রবারি শতধারে গণ্ডযুগে তার
 ধৌত করি' প্রবাহিত হৃদয়ে উদার—
 নিষ্পন্দ শরীর মন—যেন এক সাথে
 ব্যাকুল ধাবিত হ'তে মৃতের পশ্চাতে !

বিষ্ময়ে নির্বাক্ বাল্যে রহে ক্ষণকাল,
 স্বেদবিন্দু সিক্তকরে তার রক্ত ভাল,
 বক্ষোমাঝে গুরুচাপ হয় অনুভব,
 কণ্ঠরুদ্ধ হ'য়ে আসে বদনে নীরব।
 বহিল মৃদুল মন্দ সাঁঝের বাতাস ;
 বুকের পাঁজর ভাঙ্গা ফেলি' দীর্ঘশ্বাস
 অন্ধকারে যক্ষকণ্ঠা মুছিল নয়ন,
 জানিলনা কেহ আর ; ভরিল বিজন
 নদীতীর স্বরগীয়া কুমুম সৌরভে ;

ব্রাহ্মণের আঁখিজল তুলি' লয়ে তবে
ধাইল স্বরগে বালা—খুলি' গেল দ্বার !—
অশ্রুর অসীম শক্তি—শ্রেষ্ঠ অধিকার ।

প্রেমের শক্তি

সারি' ঝাঁট পাট শত ঝঙ্কাট
 কোন্ ভোর হ'তে উঠে ;
 স্নান শেষে নারী গরীবের ঘরে
 রান্না করিতে ছুটে ;—
 বোকা চালের বোকা সে ভাত,
 অমৃত বলিয়া খাবে ভরি' পাত
 বড় ছেলে ছুটি বুড়ার সাথ
 ক্ষেত হতে এসে জুটে,—
 ভাবিতে ভাবিতে গরীবঘরনী
 রান্না করিতে ছুটে ।

ছোট ছেলেগুলি যাবে পাঠশালে
 এখনিত চাই ভাত ;
 কোলের শিশুটি দুধ পায় নাই
 যোড়া রহিয়াছে হাত ;
 কাপড় কাচিতে বাকি এতগুলি,
 আনিতে হইবে শাক ছুটি তুলি
 ওই বিনা ফুঁয়ে নিবে গেল চুলি—
 শিরে করে করাঘাত !
 একফোঁটা জল তোলা নাই ঘরে
 . কি দিয়ে রাখিবে ভাত ?

গুছাইয়া সব বিণ্ডু ছেলেটার
 ছেঁড়া জামা দিল তালি ;
 এদিকে কাপড়ে দাসু হতভাগা
 মাথায়ে আনিল কালি ;
 একরাশ কাঁথা সেলাই করিতে
 সন্ধ্যা ঘনায়ে আসিল ত্বরিতে,
 লাগিল রমণী শয়ন রচিতে
 সন্ধ্যার দীপ জ্বালি ;
 দেখিল মাথাটা করে টিপ্ টিপ্,-
 কেমনে উঠবে কালি ?

চাষীদের তরে রাখিয়া পান্ত
 তুলিয়া ফেলিল হাঁড়ি
 মাড়টুকু রাখি ভাগাভাগি করি,
 কহে নিঃশ্বাস ছাড়ি’—
 “বহেনা জীবন হেনমতে আর
 চাহেনা বহিতে পায়ে দেহ ভার,”
 হেন কালে হেরে ছেলেছটা তার
 স্বামী সনে ফিরে বাড়ী,
 দাঁড়াল রমণী নিমেষের তরে
 যবে নিঃশ্বাস ছাড়ি।

দেখিল চাহিয়া যুবাদের চোখে
 বুড়ার চোখের ছবি—
 সেই সে দরাজ বন্ধের ছাতি,—
 সেই হাসি—সেই সবি,—
 চাহিয়া চাহিয়া ভ'রে উঠে প্রাণ !—
 রমণী ফিরাতে পারেনা নয়ান
 যেন শোনে কোন্ দূরাগত গান
 অসীম শান্তি-লভি',—
 কহে—“বোঝা নহে খাটুনি আমার
 হেরিলে এদের ছবি” ।



সম্মান রক্ষা

“রুদ্ধ ছুয়ার রাণীর আদেশে
 যাও ফিরে যশোবন্ত” ;—
 শুনিয়া এ বাণী নতশির রাণা
 ওষ্ঠে চাপিলা দন্ত
 যুঝি অগণ্য মোগলের সনে
 রাজপুত রাণা পরাজয়ী রণে
 সেদিন নগরী দুর্গ তোরণে
 দাঁড়ায়ে ক্ষুব্ধ বৃকে ;
 কহিলেন রাণী—“পরাজিত রাজা
 নগরে ফিরে কি মুখে ?”

ফিরিল সরমে রাজপুত বীর
 অশ্বে মারিল কষা ;
 রাজপুত সেনা গরজে গভীর
 “জয় রাণা মহাযশা,”—
 রাখাল তখন তরুতলে বসি’
 বাজাইছে বেণু উলসি বিলসি’ ;
 রাজপুত করে ঝলসিল অসি
 রবির দীপক রাগে ;
 কতিপয় সেনা অগম সমরে
 চলিল রাণার আগে ।

চলে যায় দিন নগরী শ্রীহীন
 বিষাদ মলিন পাত্ত ;
 ক্লান্ত কৃষক যায় মাঠে ভোরে,
 ফিরে করি' দিবসান্ত ;
 ঘট কাঁখে বধু তড়াগের ধারে
 চলে ধীরপদে জল আনিবারে ;—
 যে যাহার কাজে যায় সারে সারে ;—
 কোনো কথা নাহি ভাষে ;—
 ক্ষুণ্ণ হৃদয় মূক পুরবাসী
 জাতি সম্মান নাশে ।

সূর্য্য সেদিন অস্তে চলেছে
 পশ্চিম মরুপারে ;
 প্রাচী প্রান্তর হ'তে আসে ঘন
 আঁধার দুর্গ দ্বারে ;
 স্তব্ধ নগরী যেন পুরী হানা,
 দুর্গশিখরে উড়িছে নিশানা,
 নহবতে শুধু করুণ সাহানা
 বাজিতেছে থাকি' থাকি' ;
 রাজপুত সেনা—এ আঁধারে কারে
 বসনে আনিছে ঢাকি ?

রাণী কহে, “আয়, ওলো সহচরি,
 দে লো বিনাইয়া কেশ,
 সিন্দূর রাগে বসনে ভূষনে
 ক’রে দে লো বধূবেশ ;
 রাজপুত অসি সাধিয়াছে কাজ,
 ফিরেছেন রাণা গৌরবে আজ,
 দে লো খুলে তাঁর সমরের সাজ,
 আনলো বরণ করি” ।
 শিরে হানি’ কর “হায়, রাণি, হায়”
 কেঁদে কহে সহচরী ।

সেদিন নগরে ভবনে ভবনে
 উথলিল রাজভক্তি ;—
 ন্যর্থ হয়নি রাজপুত অসি—
 ব্যর্থ বাহুর শক্তি ;
 “জয় রাণা,” রাণী গৌরবে কহে ;
 বধির শ্রবণ শুনিবার নহে !
 জয় জয় রবে মহাসমারোহে
 খুলিল দুর্গদ্বার ;
 রাজপুত মান রাখি’ রাজপুত
 আলয়ে পশিল তার ।

নিজ করে রাণী মালা দিয়া গলে
 ছুর্গে আনিল দেহ ;
 কেহ দিল শিরে পুষ্প বরষি'
 চন্দন দিল কেহ ;
 জ্বলিল শ্মশানে ধূ-ধূ করে চিতা,
 বধূবেশে আসি ক্ষত্র ছুহিতা
 মৃত পতি পাশে হ'ল সহমৃতা
 পতির গরবে ভাসি' ।
 কাঁদে সহচরী “হায় হায়” করি'
 মৌনী নগরবাসী ।



অপয়া



তারায় তারায় চলে আলোর কাঁপন !—
 পরাণে পরাণে টান্—সে কোন্ গোপন
 মরমের তনুতর আকাশ বাহিয়া
 কে দিবে সন্ধান তার, দুটি চারু হিয়া
 মিলে যাহে অচ্ছেদ্য বন্ধনে, প্রয়াগের
 গঙ্গা যমুনার মত, সুখের দুঃখের
 বেদনায় ?

অন্ধকার—মেঘনামে ভবে—
 ঝরিতেছে ধারা—জলে ধরণী মগনা !—
 ওই ঘন বরষার জল কলরবে
 আজ মনে আসে এক যথার্থ ঘটনা ;

এমনি নিশীথে বসি' শুনেছি সে কথা—
 এমনি প্রলয়মেঘ সেদিনো আকাশে—
 এমনি বিজলী জ্বালা—বজ্র-ব্যাকুলতা—
 এমনি সে ঝঞ্ঝা ছুটে—বেশ মনে আসে !

‘পূজার ছুটিতে চল বেড়াইয়া আসি
আমাদের দেশে ;—ডাকি সখারে তাহার
কহিল নরেশ ; বিধু উত্তরিল হাসি’—
‘সেত বড় বেশী কথা’ ; বিদেশ বিহার
এইরূপে নিরুপিত হইল বিধুর ।

তখনো বরষামেঘ অম্বরে মেঘুর
ভাসে ঘন কৃষ্ণবর্ণ, আদ্র ধরণীর
গন্ধ নাসিকায় করে তখনো প্রবেশ,
শ্লথ হয় নাই পূর্ণ বেগ তটিনীর,
শশীর সমলভাব হয়নি নিঃশেষ ;
দোয়েল তুলেনি তান ললিত সুস্বরে,
ফুটেনি তখনো পদ্য সব সরোবরে ।

ইন্দ্রবাবু জমীদার ; সুযশঃ সুনাম
ব্যাপিয়াছে সৌরভের মত ভরি’ গ্রাম,-
দীনের কুটীর হ’তে শত সাধুবাদ
উঠিত অনন্তে উর্দ্ধে ; বহু আশীর্ব্বাদ
উর্দ্ধ হ’তে দেবগণো করিত বর্ষণ,—
নহিলে এমন শান্তি মিলে কি কখন ?

একমাত্র দীপসম কণ্ঠা ছিল গেহে
 উজলিয়া, পরদুঃখে বিগলিত স্নেহে ।
 আসিত ভিক্ষুক অন্ধ, বৃদ্ধ, যষ্টিকরে ;—
 আঁখি নাই,—হেরে নাই মূর্তি বালিকার ;
 তবুও কোমল কণ্ঠে করুণতা ভরে
 যখনি ঝরিত কর্ণে ধারা জিজ্ঞাসার—
 ‘কি নাম ? কোথায় ঘর ? কে আছে তাহার ?
 বড় কি দরিদ্র তারা ? জুটেনা আহার’ ?—
 তখনি সে দৃষ্টিহীন আঁখি করি স্থির
 ভাবিত এ স্বর বুঝি বিশ্ব জননীর !
 নীরবে কপোল বাহি’ ঝরিত আসার !
 চঞ্চল হইত তাহে প্রাণ বালিকার ;
 যা’ পেত আনিয়া দিত হাতে তুলে তার,
 বলিত, আশিষ ল’য়ে, ‘এস পুনরায়’ ।
 প্রজাদের সুখ দুঃখে ভাগ নিত বালা,
 দরিদ্র অনাথ শিশু জুড়াইত জ্বালা
 কোলে তার ; স্বাধীন কুরঙ্গ শিশু সম
 নির্মল নিরীহ কান্ত শান্ত নিরুপম
 শৈশব এমনি তার ব্যগ্র কুতূহলে,
 শাপভ্রষ্টা দেবী বুঝি ভাবিত সকলে ।

গ্রামে কোনো নবমবর্ষীয়া বিধবার
 তাপিত জনক দেয় বিবাহ আবার ;
 গ্রামের প্রধান সব মিলি' এক সাথে
 একঘ'রে করিবারে চাহে তারে ; তা'তে
 ইন্দ্রবাবু প্রতিবাদী ;—শুধু এই দোষে
 পড়িলেন ইন্দ্রবাবু সমাজের রোষে ।
 কহিলেন ইন্দ্রবাবু—“চাহিনা সমাজ
 ব্যথিতের নারায়ণে—ব্যথা দিয়ে আজ !”

সমাজ ছাড়িল তাঁরে ; ছাড়িলনা তবু
 নিরক্ষর প্রজাকুল ;—দীন পারে কতু
 ছাড়িতে যে দীনবন্ধু, সেবা পরায়ণ
 রোগে, বিপদে সুহৃদ, দুঃখে সবেদন—
 হেন জনে ? ছাড়িলনা আর সে নরেশ
 সেই নর-দেবতার ; তাঁর দয়ালেশ
 ভুলিতে পারেনা সে যে তাঁহারি লালিত,
 অনুগত সাথে সাথে সে সদা ফিরিত ।

কন্যা মাধবীর রূপে দশদিক আলো,
 আকাশ বাতাস গুণে মুখর ঘোরালো ;
 এতগুলি বসন্তের ফুলে গাঁথা মালা
 যৌবনের মধুবনে উপনীত বালা ;
 চিন্তিত জনক তার বিবাহের তরে ;
 সমাজ পাণ্ডারা সাধে বাদ, ঘরে ঘরে
 দেয় অপবাদ, ব্যস্ত করি তুলে তাঁরে ।

হেনকালে বিধুরে সে গ্রামে আনিবারে
 নরেশ করিল আয়োজন, যোগ্য ভাবি'
 মাধবীর । মহাপ্রাণ উদার মেধাবী
 সুশিক্ষিত বিধু ছিল সতীর্থ তাহার—
 তাহার স্নেহের দাবী নহে উপেক্ষার—
 তুচ্ছ নহে মাধবীর কান্তি স্বরগীয়—
 তুচ্ছ নহে শাস্ত মৃদু বচন অমিয় !—
 একবার এই গ্রামে বিধু যদি আসে
 মিলাইবে সমাজের বাধা অনায়াসে ।

শরৎ আসিল বঙ্গে সঙ্গে ল'য়ে আশা,—
 জাগিল সে প্রবাসীর প্রাণে কি তিয়াষা !
 ফুটিল সে কত সাধ নবীন আকারে
 মুক্ত পক্ষ শ্রেণীবদ্ধ হেরি' বলাকারে
 উড়িতে গগনোপরে ! বায়ু ভরে ভাসি'
 তাহাদেরি মত যায় তূলা মেঘ রাশি !
 শরৎ আসিল বঙ্গে—বাজিল বাঁশরী
 কত সুখস্মৃতি ল'য়ে আবাহন করি
 আনিল সে শারদীকে, ভরিল উৎসবে
 কানন প্রান্তর গৃহ অপূর্ব বিভবে !
 আসিল সে বিধু ইন্দ্রবাবুর ভবনে
 লভি ছুটি ; স্বাস্থ্য আশে সাধ মনে মনে
 একবর্ষ পড়া বাদ দিয়া র'বে সেথা
 দেখে যদি উপকার ; নরেশ বিজেতা
 রাজনীতিবিৎ সম তুষ্ট মনে মনে
 নিরনিছে কতরূপ প্রাসাদ গগনে !
 এমনি বিশ্বাস দৃঢ়, চিত্ত শঙ্কাহীন,—
 সুখের কল্পনা নর কর কতদিন !
 সম্মুখেতে দেখ চেয়ে নিবিড় অঁধার—
 ভবিষ্যতে বুঝা হয় গণনা তোমার ।

মিলিল দুজনে ; মাধবীর মৃদু বাণী
 ভুলাল বিধুর মন ; প্রিয়মুখ খানি—
 জ্যোৎস্না রাতে নিশ্চল শারদশশী ছায়া,
 কঙ্কন ঝঙ্কারে তার কি বিছাল মায়া !
 কি সুগন্ধ ভেসে যেত মধু স্নিগ্ধ বায়ে
 তাহার অলকগুচ্ছ উড়ায়ে ছড়ায়ে !
 কম্পিত চম্পক কলি মানিয়া বিশ্বয়
 ছলিয়া উঠিত ডালে হেরি পরাজয় !
 কাহার চরণ শব্দ, কার শুভ্র হাসি,
 কার প্রিয় আলাপন, সোহাগের রাশি,
 ঢালিত স্বর্গীয় সুখা বিধুর শ্রবণে
 দূর কুঞ্জে বাঁশরীর মত ক্ষণে ক্ষণে ?
 অথবা যমুনা বক্ষে সঙ্গীত তরল
 পূর্ণিমা নিশীথে যথা হৃদয় রঞ্জন
 তেমনি সে ভাবরাশি, ভাষা সে সরল
 অক্ষুট তথাপি সর্ব্ব ক্লান্তি বিনাশন ।
 কিংবা সরসীর নীরে দাঁড়ায় যখন
 গ্রাম্যবধু স্থির ভাবে স্নান অবসরে
 স্মরি' প্রিয়কথা ত্যজি' অঙ্গ-প্রক্ষালন,—
 ফোঁটা ফোঁটা জল ঝরে সলিলের 'পরে ;—

তখন নিকটে যদি থাকে শুনিবার
 সেই শব্দ—যদি কাছে থাকে দেখিবার
 সে উদার ভাব, সেই মনোমত জন,
 তার প্রাণে জাগে তবে যেই ব্যাকুলতা,
 তার মনে ফুটে উঠে যে স্মৃতি মোহন,
 সে কি স্বপ্ন, জাগরণ,—সে কি হর্ষ, ব্যথা
 সে যেমন পারেনা বুঝিতে ; স্তব্ধভাবে
 সুনীরবে স্মিতমুখে হেরে চারিধার
 বিধুর তেমনি ভাব ; জলদ আরাবে
 শিখী যথা মন্ত্ৰমুগ্ধ ; খুঁজিতে আহার
 নব প্রস্ফুটিত কোনো পদ্যের মৃণালে
 প্রহার করিয়া চঞ্চু মরাল যেমন
 রহে সচকিত যবে করিয়া গুঞ্জন
 উড়ে পুষ্প অধিষ্ঠিত অলি ; সেই কালে
 বিধুর ব্যাকুল আঁখি চমকিত মন
 শুনি' ধ্বনি তথা বক্ষ কাঁপে মৃদু তালে

কমনীয় কর রাখি' কপোলের পরে
 কার কথা ভাবিত মাধবী, কার স্বরে
 ঝরিত তাহার কর্ণে সঙ্গীত উদার,
 ঘুরিত আঁখির কাছে হাসিটুকু কার ;

কার তরে পুষ্পশয্যা রচি কল্পনায়
বসিয়া থাকিত একা কার ভাবনায়
যাপিত সে সারাদিন ?

পূর্ণিমা নিশীথে
বিমল কৌমুদী যবে পড়ে ধরণীতে
তন্দ্রাশ্রিত, তরুশিরে আছে ফুলকুল
আঁখি মুদি' শোনা যায় শুধু কুল কুল
তটিনীর ধ্বনি যেন কার প্রেম লাগি'
ধুম নাই সারারাত ; আছে সাথে জাগি'
ঝিল্লীকুল বাঁ বাঁ রবে ; জনহীন ঘাটে
একটি তরণী বাঁধা নত করি পাল ;
সরসী সলিলে ভাসে একটি মরাল
সঙ্গিহারা ; কোটি তারা গগন ললাটে
জলাকাশে আরো স্থির ; মাঝে মাঝে ডাকে
বিনিদ্র পাগিয়া কোনো ; হেরি' অচেনাকে
পথের কুকুর থাকি' থাকি' তুলে রব ;
মিলালে সে ধ্বনি ধরা দ্বিগুণ নীরব ।
সে সময়ে কত কথা হইত উভয়ে,—

কত উচ্চ অভিলাষ বিধুর পরাণে,
 কত গল্প, কত হাসি প্রেম বিনিময়ে ;
 বিধু কহে, “তুমি মম মান অপमानে
 একমাত্র উপাস্ত্র দেবতা ; জীবনের
 তুমি এক ধ্রুবতারা ; তুমি মানসের
 একমাত্র মানস প্রতিমা ; হে বাঞ্ছিতে :
 পাবনা কি—এজীবনে মিটিবেনা আশা-
 পাবনা কি, হে আরাধ্যা, তব ভালবাস
 তুমি সিঞ্চিবেনা বারি তাপ দগ্ধ চিতে ?
 ভুলাবেনা দুঃখ রাশি মঙ্গল সঙ্গীতে ?”
 স্থিরভাবে সুনীরবে গুনিত মাধবী,—
 গুনিত না, কি যে ভাবে রহিত বিহ্বল !
 যথা কোনো কৃষক-দুহিতা পূতচ্ছবি
 উৎস মুখে রাখি’ কুণ্ড ভরিবারে জল,
 কে প্রবাসী তার তরে ভরিত কলস
 ভাবিতে ভাবিতে গুনে কুণ্ড আসে ভ’রে ;—
 গুনেনা চাহিয়া রহে নয়নে অলস,
 ভরিয়া উছলি’বারি পড়ে ভূমি’পরে ;
 কিংবা যবে নিশা হয়ে আসে অবসান
 নবীন দম্পতী যথা তন্দ্রালস চোখে

প্রাণটুকু পরস্পরে করে' ফেলে দান
 ঘুম ভেঙে অরুণের অশ্রুট আলোকে,—
 ভুলে যায় এ বিশ্ব সংসার আন মনে
 উষার পাখীর গান শুনে ও শ্রবণে
 শুনেনা, বাড়িতে বেলা দেয় ধীরে ধীরে
 তাহাদের সুখময় শয়ন কুটিরে !
 কখন কহিত বিধু কি প্রস্রুট আশা
 প্রাণে তার, অন্তরে কি দারুণ পিপাসা !
 ইচ্ছা হয় কোনো এক সাগরের তীরে ;
 সলিল-কল্লোল-গীতি মুখর সমীরে'
 রচিয়া কুটীর ক্ষুদ্র ল'য়ে মাধবীরে
 বাহিবে জীবন ভার ; শুক সারিটীরে
 শিখায়ে প্রেমের গান স্বীয় মনোমত
 দিবে ছাড়ি, বনে বনে গাইবে নিয়ত
 সে সঙ্গীত ; সাগর কপোত দিবে সুর ;
 বনান্তরে প্রতিষ্ঠান উঠিবে প্রচুর ;
 হরিণী চকিত চোখে চাহিবে ফিরিয়া,
 ক্ষণকাল শম্পাহার যাবে বিস্মরিয়া ;
 উড়িবে গুঞ্জিত অলি ; শুনিবে মোহিত
 পাখী শাখা হ'তে মৃদু নূপুর শিজিত ;

থাকি' থাকি' দিবে তান বসন্ত কোকিল
 হরষে উঠিবে পূরি' এ বিশ্ব নিখিল ;
 হেথা হোথা যুথিকার সারি মল্লিকার,
 শ্ৰেণী ; গোলাপ কামিনী বেল সারে সার
 রবে হোথা ; সরোবর হোথায় বিমল,
 পদ্ম ফুটে রাশি রাশি কাকচক্ষু জল ;
 অতৃপ্ত তুষার মত নীলিমার দেশ
 রবে চাহি', বৃকে করি লহরী অশেষ ;—
 এইরূপ কত কথা রজনী জাগিয়া ;
 পেচক মাথার পরে যাইত ডাকিয়া,
 শুনিয়া চকিত দ্রুত বৃকের স্পন্দন—
 মাধবী সুধাত মনে—“একি কুলক্ষণ ?”

মধ্যাহ্নে নিকুঞ্জ গৃহে বসিত মাধবী
 জানালার মধ্য দিয়া লীলায়িত রবি
 পড়িত পায়ের কাছে ; তুষার বরণ
 সারস সরসী নীরে ভাসিত হরষে ;
 বহিত ঈষৎ তপ্ত মৃদু সমীরণ ;
 পড়িত সুবর্ণলতা রসাল উরসে ;

কহিত কতই কথা বিধু অনুরাগে
 মাধবীর গ্রীবা করে, বেষ্টিয়া সোহাগে ;
 আসন্ন বিচ্ছেদ ভয়ে নয়নের জল
 ভাসাইত মাধবীর কপোল যুগল ;
 প্রকৃতি সে অশ্রু হেরি' অক্ষুন্ন হৃদয়ে
 রহিত উদাস ভাবে ; অশোক বকুলে
 শাখা নাড়ি করিত কলহ ; সে উভয়ে
 হ'ত দ্বন্দ্ব কার বেশী শোভা চারু ফুলে ।

ইন্দ্রবাবু বুঝি বিধু মনোগত ভাব
 একদিন করিলেন বিবাহ প্রস্তাব ;
 বিধু মোঁন নীরব হরষে ; হলো স্থির
 ফিরি দেশে সম্মতি লভিয়া জননীর
 দিবে পাকা কথা ; কিন্তু বিদায় চাহিতে
 মাধবীর কাছে মুখে লাগিল বাধিতে ।

মাধবী যাবার কথা শুনিয়া বিধুর
 চিন্তিত ব্যথিত মনে ব'সে ছিল ঘরে,
 গুঞ্জিয়া তুলিতেছিল কি করুণ সুর
 আপনার মনে কত কাতরতা ভরে,—

(বিহগ—কাওয়ালী)

‘স্নেহ বন্ধন টুটিয়া যে যায়
 সে না কি আবার আসে !
 অলি যায় ফিরে আসে কি আবার
 দল-ঝরা ফুলবাসে ?
 পাখী উড়ে যায় কাননে স্তূদুর—
 স্তূখময় গীতি-স্মৃতিটি মধুর
 পড়ে থাকে কোথা হৃদয়ে, প্রচুর
 বাসনার কোন্ পাশে ?
 খালি খাঁচা হাতে যত ডাক তারে
 ‘আয়, পাখি, আয় আয়’ !
 মায়া ছেড়ে গেছে বারেক যে চলে
 সে কি আসে পুনরায় ?
 জাগিয়া উঠিবে শুধু হা হতাশ
 তাপিত ব্যথিত পরাণে হতাশ,
 ঘুরে ফিরে যাবে মত্ত বাতাস
 নিদারুণ উপহাসে !”

হেনকালে বিধু আসি কহিল তাহারে—
 ‘যাই তবে ?’—যেন শিরে অশনি প্রহারে
 স্তম্ভিত চকিত বালা রহিল চাহিয়া ;
 “যাবে ? আর কোনো বেশী কথা না কহিয়া
 রহিল নীরবে । কিন্তু বিধুর নিকটে
 ওই একমাত্র কথা হৃদয়ের তটে
 তুলিল কি আলোড়ন, যেন বুক চিরে
 দেখাইল ভালবাসা কি আছে গভীরে,
 করিল কি অনুরোধ, বিনীত মিনতি !
 বাহিরে আসিল চলি বিধু দ্রুতগতি ;
 কিন্তু তার শ্রুতিমূলে সস্রুণ ভাবে
 কাতরে বলিতে যেন লাগিল কে, “যাবে ?”

দীর্ঘ দশ মাস পরে আসিল ফিরিয়া
 আপন ভবনে বিধু । মেঘ বরষার
 শান্তিজল দিল ঢালি স্ববক্ষ চিরিয়া ;
 জননীরি মত তারে জন্মভূমি তার
 আবাহন করি নিল স্নেহময় বুকে ।
 ছুটি স্থান আছে, নর, ধরণী ভিতরে,

পাপ কর—পুণ্য কর—থাক দুঃখে সুখে,—
 যেখানে রাখিয়া মাথা অতি অকাতরে
 ক্লান্ত শিশুটির মত ঘুমাও নির্ভয়ে ।
 জগৎ ক'রেছে যদি তোমারে তাড়না,
 যাও জননীর কাছে, স্নেহ হৃদয়ে
 সান্ত্বনার কথা ক'য়ে মুছাবে যাতনা ।
 বুকে কাঁটা বিঁধি, পাখি, ফিরেছ বাসায়
 অনাহুত তোমারে সে দিবেনা বিদায় ।
 মাতা আর জন্মভূমি, ইহাদের সম
 কেহ নাই ধরাতলে—চরণে প্রণম ।

সম্মতির তরে বিধু জননী সকাশে
 কহে মাধবীর কথা সঙ্কোচে ও ত্রাসে ;
 মাতা তাহে অসম্মত ;—তঁাহাদের কুলে
 কলঙ্ক লেপন করা শুধু স্নেহে ভুলে ;—
 কেমনে দিবেন সায় করি উপেক্ষিত
 লোকমত ? এ তাঁহার অননুমোদিত ।—
 কঠিন অটল তাঁর মত । পাণ্ডু মুখে
 চিন্তাশ্রিত বিক্ষুব্ধ হৃদয়ে ঘরে ঢুকে

আপনার, বিধু মৌন নিস্তরু নির্বাক্ ;—
 বাতাসের দীর্ঘশ্বাসে জানালার ফাঁক্
 উঠে ভরি' আর্দ্র বরষার জলে ; পাছে
 ব্যথা পায় মনে, লিপি মাধবীর কাছে
 লিখিতে পারেনা বিধু, পাছে আশঙ্কায়
 ভরে মন ; এমনি সে দিন চলে যায় ;—
 কহিলেন মাতা শেষে “থাকুক অন্তরে
 বিবাহের কথা, হবে পরীক্ষার পরে”

পাঠরত বিধু করি' রাত্রি জাগরণ
 অতিরিক্ত পরিশ্রমে বিশ্রাম অভাবে
 পড়িল বিস্ময় জ্বরে ; ঘোর অচেতন
 কাটিতে লাগিল দিন রাত্রি সমভাবে ।
 হায় কভু স্নেহময়ী জননীর মত
 প্রকৃতি করেনা ক্ষমা নিয়ম লঙ্ঘন ;
 আপন অখণ্ড দণ্ড প্রচারে নিয়ত
 কঠোর রাজার মত তাহার শাস

জননী বসিয়া কাছে শুধান কুশল,
 গায়ে হাত বুলাইয়া দেন শিরে জল,
 শতবার দেবতার নাম ল'ন মনে,—
 বাধিল বিষম রণ মানবে মরণে !
 বাহিরে সে মেঘেজলে ভীম কোলাহল-
 রোগিকক্ষে নীরবতা রহে অচঞ্চল !

ক্রমেই বাড়িছে জ্বর, দেহ থরতাপ,
 আরস্তিল বিধু মৃদু চকিতে প্রলাপ,—
 নিমীলিত নেত্র ক্ষীণ মুখ রক্তচ্ছবি,—
 একনাম কহে শুধু “মাধবী” “মাধবী”,—
 দেখি' বুঝি এক স্বপ্ন শূন্যে উঠে চেয়ে !—
 জননী ভাবিলা মনে অপয়া এ মেয়ে ;
 দ্বিগুণ কঠিন হ'ল মন তার প্রতি,
 তার সনে পরিণয়ে আরো অসম্মতি,—
 লিখিলেন লিপি ইন্দ্রবাবুর নিকটে
 সেই মতে ; এইরূপ দৈব লিপি বটে
 মানবের ভালে কবে লেখা হ'য়ে শেষে
 তাহার সকল আশা মিলায় নিঃশেষে ।

দিনান্তে গগন প্রান্তে ডুবে ক্লান্ত রবি,—
 পাংশু মুখে শ্রান্ত চোখে শুনিল মাধবী
 সে লিপির কথা । এক পাত্রের সন্ধান
 করি' ইন্দ্রবাবু তারে কন্যা দিতে চান ।
 কিন্তু সে বিধুরে কভু পারে কি ভুলিতে ?
 মৌন মুখ চাহে যেন কারে কি বলিতে,—
 দুটি কালো আঁখি শুধু গোপনে বিরলে
 থাকি' থাকি' চাপা হুঃখে ভ'রে উঠে জলে !
 আজি তার হৃদয়ের ভগ্ন স্মৃতিপটে
 আসে সেই সব কথা ; সেই নদীতটে
 ওই সে বকুল গাছ—নীরব নিরুন্ম
 কুঞ্জগৃহ—হেলা ফেলা কামিনী কুসুম—
 তেমনি সে চাঁপাফুল পারুল মালতী—
 কপোত কপোতী বকে—উড়ে প্রজাপতি
 অমর গুঞ্জরে—দাগা যেন দেয় প্রাণে
 অতীতের সুখ স্মৃতি—বিষ ঢালে কানে
 মধু রব—ক্ষীণ তনু ক্ষীণতর হয়
 অকারণে ; জনকের জাগে মনে ভয় ।

সারিয়া উঠিল বিধু ; শুনিল কি ভুল
 বুঝে দিয়াছেন মাতা তার হৃদিমূল
 উপাড়িয়া দূরে ফেলি' ; বাজিতে বাজিতে
 মধুতন্দ্রী বীণাযন্ত্রে ছিড়ে যায় যদি
 সব তার, সে যেমন পারেনা ভুলিতে
 কোনো সুর,—লাজে মৌনী মুগ্ধ নিরবধি
 বিধুর তেমনি দশা ; যেন বার বার
 শুনিতে লাগিল কানে রোদন কাহার !
 হুহু ক'রে চারিধারে বহিছে বাতাস ,
 একি কারো দেশান্তরে তপ্ত দীর্ঘশ্বাস ?
 শুনিল সে মাধবীর শুভ পরিণয়
 হবে শীঘ্র ; ক্ষোভে ভরি' উঠিল হৃদয় ।

* * * * *

একদিন বসন্তের প্রথম আগমে
 বহুবর্ষ পরে, যবে মলয় অনিল
 ছুঁয়ে নদী গিরি তরু পশেছিল ক্রমে
 চারিধারে ; ভরেছিল এ বিশ্ব নিখিল,
 চারিদিক ছেয়েছিল অশোক বকুলে,
 আসিল নরেশ ; বেড়াইতে নদীকূলে
 গেল দুই বন্ধু মিলি ; মাধবীর কথা

সুধাইল বিধু তারে ; বিগুঞ্চ বদনে
 উর্দ্ধপানে সুনীরবে অঙ্গুলি চালনে
 কি সঙ্কেত করিল নরেশ ; বড় ব্যথা
 লাগিল হৃদয়ে ; হত চেতনের মত
 বিধু রহে স্থিরভাবে নয়নে আনত ;
 তপ্ত শলাকায় দহিয়া কে গেল বুক,
 যেন তারি জ্বালা প্রাণে চেপে ধরে মুখ ।
 মন্মরিছে তরুপাতা মন্দ সমীরণে,
 কে যেন করুণ ভাবে গাহিছে শ্রবণে,-

(বিহঙ্গ—কাওয়ালী)

“স্নেহ বন্ধন টুটিয়া যে যায়
 সে না কি আবার আসে !
 অলি যায় ফিরে আসে কি আবার
 দলঝরা ফুলবাসে ?
 পাখী উড়ে যায় কাননে সুদূর,—
 সুখময় গীতি স্মৃতিটি মধুর
 প’ড়ে থাকে করি’ হৃদি ভরপুর
 বাসনার কোন্ পাশে !

খালি খাঁচা হাতে যত ডাক তারে—

‘আয় পাখী, আয় আয়’ !

মায়া ছেড়ে গেছে বারেক যে চ’লে

সে কি আসে পুনরায় ?

জাগিয়া উঠিবে শুধু হা হতাশ

তাপিত ব্যথিত পরাণে হতাশ ;

ঘুরে ফিরে যাবে মত্ত বাতাস

নিদারুণ উপহাসে !



সন্ধ্যা প্রদীপ

ছিলাম সেদিন নদীর ধারে ব'সে আপন মনে,
 দিচ্ছে উঁকি সাঁঝের তারা নীল গগনের কোণে ;
 মলয় বাতাস মৃদুশ্বাসে ছড়ায় ফুলের বাস,
 পদ্মবনের আশে পাশে চ'রে বেড়ায় হাঁস ;
 গ্রামের মাঠে ঝোপে-ঝোপে ঝিল্লী তুলে তান,
 ডোবার পাশে কাদাখোঁচার কার্য্য অবসান ;
 কাদের দুটী ছেলেমেয়ে প্রদীপ ল'য়ে হাতে
 জ্বলতে' বাতি নদীর ধারে এল মায়ের সাথে ।

জ্বলে প্রদীপ নদীর ধারে ভাইবোনেতে মিলে,
 কম্প ছায়া পড়ল নদীর চঞ্চল সলিলে ;
 উদ্ভাসিল বিমল হাসে তাদের কচি মুখ,
 প্রদীপ দেখে হাসি দেখে মায়ের ভরে বুক,
 গৌরবেতে পুলকরেখা সর্ব গায়ে ফুটে,—
 মাতৃস্নেহ মহানন্দে নেত্র-ধারে ছুটে ;
 ব্যাকুল মনে ভাইবোনেরে বক্ষে চাপে বালা ;
 দেখেছিলাম নদীর ধারে সেদিন প্রদীপ জ্বালা ।

আজ্কে বহুদিন পরে সেই নদীটির ধারে
 ব'সে আছি কতই কথা ভাবছি বারে বারে ;
 রবি তখন যাচ্ছে ডুবে বেণুবনের পাশে
 একটি দু'টি ফুটছে তারা বিমল সন্ধ্যাকাশে ;
 কেমন যেন ফাঁকা ফাঁকা ঠেকছে আমার সব,-
 বড়ই করুণ লাগছে কানে নদীর কলরব ;
 প্রদীপ হাতে নদীর ধারে এল তখন বালা,
 মনে হ'ল সেদিনের সে সঁঝের প্রদীপ জ্বালা

মনে হ'ল কোথায় তারা প্রদীপ ল'য়ে হাতে
 সেই যে দু'টি ছেলেমেয়ে—নেই ত আজি সাথে !
 দারুণ ব্যথা দিল আঘাত হৃদয় গৃহ-কোণে,
 'কোথায় তারা ? কোথায় তারা ?'—সুধাই মনে মনে ;
 মাতার শীর্ণ মুখের পানে দেখি কুতূহলে,—
 দুটি ফোঁটা অশ্রু ভেসে গেল নদীর জলে ;
 গেল চ'লি সুখে থাকুক উচ্চারিয়া বালা ;
 দেখছি ব'সে নদীর ধারে দুটি প্রদীপ জ্বালা !

পাষণী

অন্ধতমস নিশীথে বিল্লী
 মুখরে পল্লীপথে ;
 রাজার কুমার বাহিরায় চড়ি'
 একাকী স্বর্ণরথে ;
 মনোরথ সম উদ্দাম-গতি—
 বিদ্যুৎ যেন চলে বেগবতী—
 উড়ে রথ দূরে রাখি' লোকালয়,
 গিরি-তরু ফেলি' পিছে ;
 নিরখি' সে যেন লাজে তারাগণ
 লুকায় মেঘের নীচে !

দূর যাহা ছিল নিমেষে সমীপ,
 সমীপ যাইল দূরে ;
 নীরব রজনী ভূতের মতন
 বেড়িল বিশ্বপুরে ;

কোমল পরশে বায়ু গায়ে লাগে,
 নিশি-চম্পক ফুলের পরাগে
 কুমারের প্রাণে উন্মাদ জাগে,
 ঘন হ'য়ে আসে শ্বাস ;
 গল্পের কোন অজানা পুরের
 ধীরে ধীরে ছুটে আশ !

রশ্মি ছাড়িয়া করে কষাঘাত ;—
 কোথা ঘাট—কোথা পথ !
 তেপান্তরের মাঠ পার হ'য়ে
 ছুটিল সবেগে রথ,—
 সহসা কোথায় বালুকার রাশে
 ঢাকা বাধি' রথ থির হ'য়ে আসে ;
 রাজার কুমার নামিল তরাসে,—
 দিক্ হ'য়ে গেল ভুল !
 সমুখে হেরিল বিশাল জলধি
 নাহি দেখা যায় কূল !

রথ হ'তে খুলি অশ্বে চড়িয়া
 বালিয়াড়ি হ'য়ে পার ;
 -তরুমূলে দাঁড়ায় কুমার
 আহ্বান শুন' কার !
 সাগর দোলার তান পশে কানে
 শত কিন্নরী রত যেন গানে !
 প্রভু-ইঙ্গিতে লজ্জি' জলধি
 ছুটিল অশ্বরাজ ;
 ছুটিল তড়িৎ কুমারের দেহে
 বীরের দর্পে আজ

চলিতে চলিতে এল কোন্ পুরে,
 পাষণ সকলি তথা !
 পাষণ মানব পাষণ মানবী
 পাষণ বৃক্ষলতা !
 রাজার প্রাসাদে সিংহদুয়ার
 পাষণ প্রহরী প্রহরায় তার !
 হেরিয়া চকিতে দাঁড়ায় কুমার,
 বিস্ময়ে ভরে আঁখি !
 নিজ ধমনীতে শোণিত স্পন্দ
 শোনা যায় থাকি' থাকি' !

বিশাল সে পুরে নাই কোনো সাড়া,
 কুমার অবাক রহি'
 পশিল ভিতরে অভিভূত ভাবে
 হৃদয়ে আবেগ বহি' ;
 কক্ষের পর কক্ষের পরে
 পাষাণ সাজানো হেরে সারে সারে—
 পাষাণের ফুল পাষাণের ঝরে,
 পাষাণের শুক-সারি !
 রাজার কুমার পরশি' পরশি'
 চলিল সকলি তারি ।

কুমার যেখানে পরশে সেখানে
 তখনি চেতনা জাগে !
 ফুল ফুটে উঠে—পাখী গাহে গান
 যেন নব অনুরাগে !
 শেষ দূরে এক কক্ষে পশিয়া
 হেরিল কুমার—বিস্মিত হিয়া—
 শিলা-পালঙ্কে শিলা শেষ নিয়া
 শায়িত পাষাণ রাণী !
 পাষাণ—তবুও অঙ্গলাবণ্যে
 উজল কক্ষ খানি !

অনিমেঘ আঁখি রাজার কুমার !
 হেরিয়া না মিটে সাধ !
 মনে মনে বলে, 'অয়ি অনিন্দ্য
 লইওনা অপরাধ !
 এতকাল ধ'রে যা ক'রেছি মনে
 সুন্দর চাকু যতনে গোপনে,
 তারি সার তব অঙ্গ-গঠনে
 কেমনে ভরিল আজ ?
 কল্পনা মম না জানি কেমনে
 ধরিল মূর্তসাজ ?'

মুখে বলে, 'ওগো চির-বাহুজিতে
 কোথা ছিলে এতদিন ?
 তোমার বিহনে হিলাম কেমনে
 গৃহহারা উদাসীন ?
 আসিয়াছি আজ নবীন মিলনে,—
 চির-পুরাতন অয়ি অতুলনে,
 হের আঁখি মেলি, ঢাল এ শ্রবণে
 তোমার অমিয় বাণী' ।—
 কুমার-পরশে চেতন সে পুরে
 নীরব পাষণ-রাণী ।



পাষণ-রাণী বা ব্যর্থ সুর্যোগ

আজকে তুমি কাহার লাগি'

কি গান গাহ পাষণ-রাণী ?

ব্যাকুল প্রাণে করুণ তানে

শুনিতে চাও কাহার বাণী ?

সেদিন শত সুর্যোগ তুমি

কেমন কর অবহেলা,

বেদন শত—সাধন শত

তুচ্ছ ভাবি' কাটাও বেলা !

রাজার ছেলে ঘোড়ায় চড়ি'

দাঁড়ায় এসে তোমার দ্বারে !

কি অনুরাগ ! কত সোহাগ !—

কেমনে হয় ফিরাও তারে ?

ঈশান কোনে বিষণ বাজে

পাষণ রাণী !—পাষণ রাণী !

রাজার ছেলে ফিরিয়া যায় ;—

কে বুঝিবে তোমার বাণী ?

বিফল প্রাণে সফল করি'

কে ফোটাবে তোমার আশা ?

কঠিন মুখে মনের সুখে
 কে ছোটাবে মধুর ভাষা ?
 কিসের ভুলে ছুয়ার খুলে
 নিলেনা তায় তোমার ঘরে ?
 লগ্ন গেল ভগ্ন হ'য়ে
 সেদিন তব স্বয়ম্বরে !

শ্মশান পুরী ! শ্মশান পুরী !—
 পাষণ রাণী ! পাষণ রাণী !—
 দরশ কোথা পাবে তাহার
 সরস যাহার পরশ খানি ?
 সারিকা শুক বসিয়া মুক
 রইবে চাহি উদ্ধমুখে,—
 প্রাচীর কারা, চন্দ্র, তারা,
 কাঁদিবে, হায় ; তোমার দুখে,—
 দুর্গদ্বারে স্বর্গলেহি
 নিশান-খানি পড়বে ঢ'লে,—
 বিদায় দেহ কাঁদায়ে যায়
 পাবেনা তায় চোখের জলে !

নিত্য তুমি চিন্তময়ী—

সত্যযুগের পাষণ রাণী !

বুকে তোমার নিব্বার কোথা

সেই কথাটি কেউনা জানি !

পাথর চাপা উৎস তব

ভস্ম চাপা বহিস্ম ;

কে জানে কোন্ থরের তলে

প্রদেশ রহে নত্ন-তম !

অজ্ঞাতে তাই আঘাত করি

নিত্য ফেরে রাজার ছেলে,—

পাষণ চাপা বিষাদ প্রাণে

পোষণ কর অবহেলে ।



সাধু

[Parnellএর Hermitএর অনুকরণে]

বৃদ্ধ এক সাধু ছিল গিরি গুহা বাসী—
 শ্বেত-শ্মশ্রু, শান্ত চোখ, মুখে মৃদু হাসি।—
 নিসর্গজ ফলমূল—নির্ঝরের জল
 উন্মুক্ত পবন বনে—হৃদয়ে সরল
 যথেষ্ট মানিত ; যেত বিনা-ভাবনায়
 বাধাহীন দিনগুলি ; গ্রন্থ হ'তে, হায়,
 জানিয়া সংসার-রীতি জাগিল সংশয়—
 ধর্ম অধর্মের বশ—অধর্মের জয়।—
 প্রশান্ত তড়াগে যথা বনভূমি, তীর ;
 আকাশ, নক্ষত্র, চাঁদ প্রতিবিম্বে স্থির ;
 কিন্তু তার মাঝে এক লোষ্ট্র নিক্ষেপিলে
 ভাঙ্গা তীর তারা নভঃ কম্পিত সলিলে ;
 তেমনি সাধুর মনে ভাঙ্গিল সংযম,
 ভাবিল এ পুণ্য ধ্যান সবি তবে ভ্রম ?

‘স্বচক্ষে দেখিব ধরা’ ভাবি মনে মনে
 বাহিরিল পথে সাধু ; দুৰ্গম বিজনে
 হেরিল যুবক এক অন্ত পথ বাহি’
 আসে আনন্দের গান আনমনে গাহি’ ;
 হাসি হাসি মুখ খানি—নীলোৎপল চোখ—
 প্রশস্ত ললাট শান্ত ;—ব্যথা রোগ শোক
 করে নাই রেখাপাত পুষ্ট অবয়বে—
 ঢল ঢল সৰ্বদেহ যৌবন গৌরবে ;—
 সাধুরে বন্দিল যুবা—জিজ্ঞাসিল পরে
 ‘কোথা গতি’ ? সাধু বলে—‘জেগেছে অন্তরে
 ঈশ্বরের করুণায় দারুণ সংশয়,—
 শুনেছি সংসারে নাকি অধর্মের জয়—
 স্বচক্ষে দেখিব তাই”। যুবা কহে তবে—
 “আমারো বাসনা মনে হেরিব এ ভবে,—
 এক সাথে যাই চল”। সাধু তুষ্ট মনে
 যুবার বচন শুনি’ ; তত্ব আলোচনে
 ঘুচিল পথের শ্রান্তি ; কথায় কথায়
 বিকাশে মনের মিল ; সাধু মুগ্ধপ্রায়
 শুনিতে লাগিল তার জ্ঞানগর্ভ বাণী ;
 সূর্য্য গেল অস্তাচলে ; ঢাকিল বনানী
 সান্ধ্য অন্ধকার ; অস্পষ্ট হইল বনপথ ;

শ্রান্ত পান্থ-যুগ হেরে প্রাসাদ বৃহৎ
 রম্য চারু কারুকার্যে খচিত সুন্দর
 দাঁড়ায়ে সম্মুখে যেন মুক্ত করি কর
 পথহারা পথিকেরে করিছে আহ্বান
 আশ্রয় দিবার তরে মূর্ত্ত সাম-গান ।
 তোরণে দ্বারীরে যুবা আগম বারতা
 জানাইল দুজনের ; অতিথির কথা
 শুনি' গৃহস্থামী তথা আসিল ত্বরিতে
 যথা রীতি বন্দি' পদ ঘরে ডেকে নিতে ।
 দিল দৌহে স্বর্ণথালে স্বাচ্ছ আহারীয়
 করিতে ভোজন ; দিল সরস পানীয়
 সোমরস স্বর্ণপাত্রে ; শয্যা দিল পাতি'
 নবীন কোমল শুভ্র কাটাইতে রাত্তি ;
 পরিচর্যা পরিতৃপ্ত সাধু ভাবে মনে
 ধনীর এমন মন মিলেনা ভুবনে ।

ভোর হ'তে ডাকে পাখী ; আলো চারিদিক ;
 গৃহস্থামী করে প্রশ্ন সৌখ-শায়নিক ;
 সানন্দে বিদায় নিয়া চলে পান্থ-দ্বয় ;
 বহে মৃদু স্নিগ্ধ বায়ু ; এক দুঃখ রয়

গৃহস্বামী মনে,—কোথা হারালো কি জানি
মিলিল না মহামূল্য স্বর্ণপাত্র খানি।

যেমন উদ্ভতফণা সর্প নেহারিয়া
পাথিপার্শ্বে পান্থ ভয়ে উঠে চমকিয়া,
সম্মুখে সরেনা পদ, নিরুদ্ধ বচন,—
সাধুর তেমতি ভাব যুবক যখন
পাথিমধ্যে বাস হ'তে করিল বাহির
সেই পাত্র স্থিতমুখে ; সাধু নতশির ;—
দূরে যেতে চাহে তার বিদ্রোহী অন্তর ;
স্বপ্নভ্রান্ত সম তবু, রুদ্ধ ওষ্ঠাধর ;
যায় সাথে ; ভাবে মনে 'একি অবিচার !
উদারতা লভে হেন হীন পুরস্কার !'

চলিতে চলিতে পথে সূর্য্যে আবরিয়া
উড়িল প্রলয় মেঘ গভীর গর্জিয়া ;
সৃষ্টি বিনাশন বৃষ্টি ওই বুঝি আসে
পবন এ সমাচার কহে স্পষ্ট ভাষে ;

পশু পক্ষী ছুটে নীড়ে ; হেরি পান্থদ্বয়
 ছুটিল নিকটে কোথা লভিতে আশ্রয় ;—
 হেরিল বৃহৎ সৌধ রুদ্ধ বাতায়ন,—
 তোরণ অর্গল-বদ্ধ ; শুধু কাঁটাবন
 আশে পাশে ; জীর্ণ চালা নাহিক সংস্কার
 এদিকে ওদিকে আছে—মরু চারিধার ;
 শোষিয়া শোণিতসম দরিদ্রের ধন
 করিয়াছে গৃহহারা নিম্নর্ম কুপণ ।
 তার দ্বারে পান্থযুগ উপনীত যবে
 শিলাবৃষ্টি এল নামি' ঘন ঘোর রবে ;
 বজ্রঘোষে বিকম্পিত কানন প্রান্তর
 আকাশের বুক ফাটা জ্বালা নিরন্তর ;
 ঠেলিতে ঠেলিতে দ্বার করি' কোলাহল,
 ঈষৎ করুণা বুঝি করিল চঞ্চল
 কুপণের মন ; তাই সশব্দে কাতরে
 অর্গল খুলিল দ্বারে অতিথির তরে
 সেই সে প্রথম ; দিল অল্প পরিমাণ
 অন্ন, তীব্র সোমরস,—কদর্য্য সে দান ;
 আকাশ যেমনি কিছু হ'ল পরিষ্কার
 অমনি বিদায় দিল করি নমস্কার ।

সাধু মনে মনে ভাবে মানিয়া বিষয়-
 এত অৰ্থে কেন এত ঘণিত হৃদয় !
 হে ঈশ্বর একি তব মিছে পক্ষপাত ;
 এতখন অকারণ রাখ রুদ্ধ নাথ !
 বিষয় কতই আরো বাড়িল তাহার,
 বাস অভ্যন্তর হ'তে যবে আপনার
 দয়ালুর হাত সেই স্বর্ণপাত্র খানি
 কৃপণেরে দিল যুবা ! মুখে নাহি বাণী,
 সাধু চলে অভিভূত সংশয়িত মন ;
 পাপ সেথা—হেথা একি মত্ত আচরণ !

পশ্চিম গগনে ক্রমে দিবা অবসান ;
 খুঁজে পুনঃ উভে নিশা যাপনের স্থান ;
 হেরিল সম্মুখে এক রম্য নিকেতন
 অতিথির তরে মুক্ত,—পবিত্র ভবন,
 অযথা দীনতা নাই—নাই আড়ম্বর ;
 সুসজ্জিত চারিধার—শ্যামল প্রান্তর ;
 গৃহস্থামী শান্তমূর্তি—ধৰ্ম্মে রত মন,
 নাশি' পরদুঃখ করে জীবন যাপন,
 নিৰ্মল হৃদয় তার উদার সতত
 উদ্ভানের সত্যফুট পুষ্পটির মত ।

সাধু আসিয়াছে গুনি' ত্বরা করি' আসে
 স্মিতমুখে করযোড়ে কহে নতভাষে,—
 যাঁহার কৃপায় চরে বিশ্ব চরাচর,
 আলো দেয় রবি শশী, পাষণ ভূধর
 মৰ্মবারি করে দান, ফল শস্যে ভরা
 বহিয়া যাঁহার অৰ্ঘ্য হাসে বসুন্ধরা,—
 তাঁর প্রেম দয়া স্মরি' করি আবাহন
 এ কুটীরে, কর সাধু আতিথ্য গ্রহণ।”

এত বলি' বন্দি' পদ পথিক যুগলে
 বসাইল গৃহ মাঝে ; নানাবিধ কলে
 খাঙ দিল সাধারণ—নাই বিলাসিতা,
 করে নাই তবু কিছু কৃপণতা বৃথা ;
 ত্বহার সুপেয় দিল নিরমল জল,
 বাহুল্য নাহিক তবু পর্যাণ্ত সকল।

অনন্তর বহুবিধ কহে ধৰ্ম কথা ;
 পুত রামায়ণ গীতি—পুরাণ বারতা ;

রাত্রি হ'লে করি' ইষ্টদেব আরাধনা
 পদনাভে স্মরি' করে শয়ন রচনা ;
 ভক্তিপূর্ণ গদ গদ সাধুর হৃদয়,
 ধন্য মানে গৃহস্থের লভি পরিচয় ।

রজনী কাটিল সুখে ; উষার আলোকে
 যুবকে হেরিল সাধু ভীতিপূর্ণ চোখে,
 তঙ্করের সম যেতে গৃহস্থের ঘরে
 অতি সন্তর্পণে ধীরে মৃদু পদ ভরে ;
 গৃহস্থের একমাত্র আদরের ধন

যথা রহে শুয়ে ঘুমে অচেতন
 দাঁড়াল যুবক তথা ; দ্বার ছিদ্ৰ দিয়া
 এক দৃষ্টে হেরে সাধু—কেঁপে উঠে হিয়া ;
 অকস্মাৎ শিশুকণ্ঠ যুবক নিষ্ঠুর
 চাপিল পাশব-বলে ; সাধু ভয়াতুর—
 চীৎকারি উঠিতে চাহে—মুখে বদ্ধ স্বর—
 রোমাঞ্চিত সর্বদেহ—একি ভয়ঙ্কর !
 মুহূর্তে আছাড়ি' মুষ্টি গৃহস্থ-গৌরব
 নীলমুখে শিবনেত্রে নিষ্পন্দ নীরব !

অবাক্ ব্যাকুল সাধু বাহিরিল পথে
 দ্রুতপদে রুদ্ধশ্বাসে ; আর কোনো মতে
 চলিতে যুবার সাথে চাহেনা হৃদয় ;
 উদাসী যুবক তরু সাথে সাথে রয় ।

কাননে মিলেনা পথ ; ভৃত্য একজন
 পথিক যুগলে করে পথ প্রদর্শন ;
 কিছুদূর অগ্রসরি উত্তুঙ্গ পর্বতে
 অপ্রশস্ত খরশ্রোতা নদী পড়ে পথে,
 ছুটিতেছে ঘূর্ণিপাকে সুগভীর জল,
 মৃত তালবৃক্ষ-সেতু পারের সম্বল ;
 আগে আগে চলে ভৃত্য সতর্ক পা ফেলে ;—
 চকিতে পিছন হ'তে যুবা দিল ঠেলে—
 উঠিল সে জলোচ্ছ্বাস—ভৃত্য দেহ তাহে
 একবার গেল দেখা খর সে প্রবাহে
 বাহু প্রসারিয়া করে বিফল প্রয়াস—
 নিমেষে মিলাল কোথা নয়নে হতাশ !

সব নেহারিল সাধু ; পুঞ্জীভূত রোষ
 দীপ্ততেজে এতক্ষণে লভিল নির্ঘোষ—
 “ঘণিত পাষণ্ড, ওরে”—বলিতে বলিতে
 যুবা আর যুবা নাই হেরে আচম্বিতে !
 হেরিল সে মুখে জ্যোতিঃ পুণ্য স্বরংগীয়,
 হেরিল সে পূর্ণছাতি নয়ন অমিয়,
 হেরিল সে স্নিগ্ধ কান্তি দীর্ঘ অবয়ব,
 বিকসিত সর্ব্ব অঙ্গে অমরা বৈভব ।
 স্বর্গীয় কুসুমবাস আসে বায়ুস্তরে,
 ব্যোম পথে যেন শত বীণাধ্বনি করে !
 মুখে এসেছিল যাহা র’য়ে গেল মুখে
 নতজানু সাধু সেই মুরতি সম্মুখে ।

দিব্য মূর্ত্তি এতক্ষণে ভাঙি’ নীরবতা
 বীণা-বিনিন্দিত সুরে আরম্ভিল কথা,—
 “তব জ্ঞান, আরাধনা, নিষ্পাপ জীবন
 প্রভুর চরণে করে দীন আবেদন ;
 দেবতা সে আবেদনে গলি’ করুণায়
 মিটাতে সন্দেহ তব পাঠাল আমায় ;
 স্বর্গ পরিহরি’ তাই আসিয়াছি নামি’ ;
 করিও না নতি, তব সহভূত্য আমি” ।

“দৈব নীতি মেনো মনে মহা সত্যময়
 আনিও না কভু আর হৃদয়ে সংশয় ;
 সৃষ্টিতে স্রষ্টার রহে পূর্ণ অধিকার
 কীট তুমি কেমনে তা’ করিবে বিচার ?
 তাঁহার উদ্দেশ্য গুঢ় বুঝিবে কেমনে ?
 সাধিছেন কত হিত রহিয়া গোপনে !
 আপনি আড়ালে রহি’ করান যে কাজ
 যশঃটুকু অণ্ডে লয়ে ফেলে রাখে লাজ,
 সে লাজ মহিমা তাঁর তাহাই গৌরব
 না বুঝিয়া করে দোষী অযথা মানব” ।

“কি আর বিস্ময়কর ইহার অধিক
 হেরিলে যা’ কুতূহলী স্বচক্ষে, পথিক !
 সুবিস্তৃত জেনো তবু তাঁর গায় পাশ
 বুঝিতে পারনা যেথা করিও বিশ্বাস” !

“মহামূল্য আহারীয় দিল যে গর্বিত,
 সাধুতা রহে না যার মনে বিকসিত,

যাহার ঐশ্বর্য্য দন্ত কনক-কলসে
সমাদরে অতিথিরে নিত্য সোমরসে,
বিনষ্ট তাহার রীতি হেমপাত্র সনে ;
আতিথ্য এখনো আছে, গর্ব্ব নাই মনে” ।

“আর সেই গাঢ়মুষ্টি কঠোর কৃপণ—
তাহারে সুবর্ণপাত্র করি সমর্পন
এই শিক্ষা দিল তারে প্রভু দয়াময়,—
নর যদি দয়া করে—দেবতা সদয় ;
আপন হীনতা স্মরি’ ভাসে আঁখিজলে
নিষ্ঠুর হৃদয় তার করুণায় গলে ;
এমনি বুঝিবা শিল্পী তাপ দিয়া শিরে
খনিজ ধাতুর মলা আনয়ে বাহিরে” ।

“ধার্ম্মিক বন্ধুটি তব চলে ধর্ম্মপথে
হয় নাই বিচলিত কভু কোনো মতে ;
এমন উদার প্রাণ—পবিত্র জীবন
ভগবানে এত ভক্তি দেখনি কখন !

বার্ককো এ শিশু তাকে পুনঃ মায়াপাশে
 সবলে টানিতেছিল সংসার সকাশে ;
 মনের সংযম তার গিয়াছিল টুটি ;
 শিথিলিত ধৰ্ম্মগ্রন্থি যেতেছিল ছুটি ;
 অবসান হ'ত এর কোথায় কে জানে !
 জনকে রক্ষিতে প্রভু নিলেন সন্তানে ;
 তুমি ভিন্ন সবে হেরে মৃত্যুহেতু রোগ ;
 সাংঘাতিক এই কার্যে আমার নিয়োগ !
 চূর্ণ অহঙ্কার পিতা অবনত শিরে—
 দণ্ড সমুচিত মানি' মুক্তি পথে ফিরে" ।

“কত ক্ষতি হ'ত আজি নহে বলিবার
 ফিরিত এ ভৃত্য যদি গৃহে আপনার ;
 ধার্ম্মিকের সব ধন হরিত সে রাতে,
 কত শুভ-কার্য্য, বল ব্যর্থ হ'ত তাতে !
 দরিদ্রের আঁখিজল মুছিত কি দিয়া
 ওই ভণ্ড চোর যদি রহিত বাঁচিয়া !
 নৈতিক নিয়ম তাঁর এমনি ভুবনে
 যাও ফিরি' অবিশ্বাস আনিও না মনে" ।

বলিতে বলিতে মূর্তি মিশে বায়ুস্তরে ;
 স্তম্ভিত নির্বাক্ সাধু যোড় করি' করে
 করে স্তব—“পূর্ণ হোক্ তোমার বাসনা
 হে প্রভু জগতীতলে—তোমার কল্পনা
 অব্যাহত হোক্ দেব স্বরগে যেমন” ।
 এত বলি' সাধু ফিরে গুহায় আপন ।



কি বেশে এলে ফিরে !

[সার আশুতোষ মুখোপাধ্যায়ের তিরোভাবে]

সেদিন তুমি বেরিয়েছিলে

কিরীটপরা শিরে,

বঙ্গ-সুধী-সভার মণি,

কি বেশে এলে ফিরে ?

কাঁদিয়ে সারা বঙ্গভূমি—

মোঁনী তুমি—বধির তুমি—

‘নয়ন মেল বুধাগ্রণী

নয়ন মেল ধীরে,

কি বেশে তুমি বেরিয়েছিলে

কি বেশে এলে ফিরে ?’

বিরিট তব রোমশ তনু

কম্বপটু কত,

দর্পী তব মস্ত্রে তেজে

সর্প অবনত !

সে দেহ আজি অবশ হেন
 আনিছে সবে বহিয়া কেন ?
 সে তেজ আজি নির্বাপিত
 ভারতী মন্দিরে ?
 কি বেশে তুমি বেরিয়েছিলে
 কি বেশে এলে ফিরে ?

এই বিশ্ব-বিদ্যালয়—
 চিনিতে নার তারে ?
 আপন হাতে গড়েছ, রাজা
 প্রহরী ছিলে দ্বারে ;
 এখন তার দুয়ার-দেশে
 শয়ান-দেহ লুটালে এসে,
 কাঁদিয়ে প্রতি-রেণুটি তার
 তোমারে ঘিরে ঘিরে !
 কি বেশে তুমি বেরিয়েছিলে—
 কি বেশে এলে ফিরে !

এই ত পথে জয়ীর মত
 গিয়েছ মাথা তুলে,
 আজ কি বেশে চলেছ সেথা
 ঢাকিয়া ফুলে ফুলে ?
 বন্দনা সে কে যাবে গাহি' ?
 কাহারো মুখে শব্দ নাহি !
 বিশাল জনসংঘ হের
 তিতিছে আঁখিনীরে ।
 কি বেশে তুমি বেরিয়েছিলে—
 কি বেশে এলে ফিরে !

না না না, দেব, ঘুমাও সুখে—
 বৃথা এ শোক আজ—
 আজ যে তুমি হৃদয়-জয়ী
 রাজার মহারাজ !
 আজ যে তব জয়ের সেরা
 বিজয় সারা বাংলা ঘেরা,—
 যাজ্ঞিকেরা তৈ'রী তব
 পতাকা নিতে শিরে
 যখন তুমি, হে শাস্ত্রনু,
 এ বেশে এলে ফিরে !

এই ত মাঠে নিত্য ভোরে
 করিতে বিচরণ,
 তরুরা ছায়া-নিবিড় হাতে
 করিত আবাহন,
 আজ সে তারা অবাক্ চাহি',
 পাখীরা কাঁদি উঠিছে গাহি',—
 ছপুরবেলা কেন যে এলে
 সুধায় সাথিটিরে ;—
 কি বেশে তুমি বেরিয়েছিলে—
 কি বেশে এলে ফিরে !

ওই ত তব ভবন—হোথা
 চাহিয়া পথপানে
 অতীত-স্মৃতি-মগ্ন বাল্য
 কপালে কর হানে—
 সে ছিল ফুলশয্যা ওরে
 কান্ত সুখ যুগান্তরে—
 এ কি এ ফুলশয্যা আজি !
 বুক যে গেল চিরে !
 কি বেশে তুমি বেরিয়েছিলে—
 কি বেশে এলে ফিরে !

এই বাড়ীতে জড়িয়ে আছে
 তোমার স্মৃতি সব,
 তোমার তরে এই বাড়ীটি
 গ্রামের গৌরব
 আজ এখানে নিবিল বাতি—
 নিবিল সারা গ্রামের ভাতি,
 ছপূৰবেলা আঁধার রাতি
 ফেলিল পুরী ঘিৰে !
 কি বেশে তুমি বেরিয়েছিলে—
 কি বেশে এলে ফিৰে !

চুকিয়া ঘৰে খুলিলে না ত
 তোমার রণসাজ,—
 ছেলেরা কোথা মেয়েরা কোথা
 সুধালে না ত আজ,
 আজ ত কারো মিলে না সাড়া !
 রাণী মা ডাকে—তারি কি তাড়া ?
 স্নেহের ব্যথা—কস্ম হ'তে
 টানিয়া নিল ধীৰে ?
 কি বেশে তুমি বেরিয়েছিলে—
 কি বেশে এলে ফিৰে !

এই ত ভবদেহের তব
 যাত্রা হেথা শেষ।
 অসীম-সীমা-মিলন-ভূমি
 পবিত্র এ দেশ!
 হেমন্ত সে প্রথমে আসে,
 এই আকাশে—এই বাতাসে
 জড়িত পিতামাতার স্মৃতি,
 এই এ নদীতীরে
 রাণী মা ডাকে তাই কি তুমি
 এ বেশে এলে ফিরে?

পার্থিব সে ভস্ম হোক—
 পুড়িয়া হোক ছাই!
 অপার্থিব সোণা সে তব—
 মৃত্যু তার নাই!

যে বাতি তুমি জ্বলেছ দেশে
বঙ্গবাসী দুহাতে এসে
ধরুক তুলে—এ শোক ভুলে
 উজলি' স্মৃতিটিরে,
মরণে হও মৃত্যুজয়ী
 চেতায় বাঙালীরে
রবেনা আর ভাবনা তবে
 কি বেশে এনে ফিরে



মালাকরের একদিন

∴∴∴

ভোরের পাখীর কলরবে
 রাজার বাগানে ফুল তুলি,
 স্নান সারি' উঠি' ঘাটে যবে
 মেয়েরা ঝাড়িছে চুলগুলি ;—
 একে একে ভরিল গাগরী,
 গেল চলি' ঘট কাঁখে করি',
 ফোঁটা জলে বাঁকা পথ ধরি'
 বরশোভা ধরে পথধূলি ;
 তারিণী রাজার দাসী শুধু
 ছুতা করি' বাঁধে চুল খুলি' ।

মাথায় রহিল ফুল তোলা
 আনমনে বেলা বেড়ে যায় !
 ওই যে ছুটিয়া আসে ভোলা,
 রাজা আজ রেগেছে বেজায় ;

তাড়াতাড়ি ভরি ফুলডালি,
 দূর হ'তে শুনি গালাগালি—
 “পাজি ছুঁচো হতভাগা মানী”,—
 শুনি নাই কভু মিঠে বুলি।
 তারিণী ছুটিল ঘাট ছাড়ি'
 বাঁধিতে বাঁধিতে চুলগুলি।

ফুল ল'য়ে ছুটিলু দুয়ারে
 ভোলা বলে 'হবে আজ খুব'
 দাঁড়াইলু আঙিনার পারে
 রহিলু ডালাটি হাতে চুপ।
 বহুক্ষণ এসেছে পূজারি,—
 রাজা ক্রোধে ছুঁড়ে জলঝারি,
 ললাটে লাগিয়া লোহবারি
 বেগে ছুটে বক্ষ উঠে ফুলি',
 তারিণী রাজার দাসী শুধু
 খুলে ফেলে বাঁধা চুলগুলি।

সহসা উঠিলু রোষে রুখে—

এতকাল সহিয়াছি সব—

রক্ত দেখি' হাসি এল মুখে

এই না কি পূজার উৎসব !

এই গেহে এই সমারোহে

এতকাল কাটানু কি মোহে !

দূঢ় করে অসীম বিদ্রোহে

দাঁড়াইলু ঝারিখানি তুলি' ;

তারিণী রাজার দাসী দেখি

চেয়ে আছে আকুলি বিকুলি' ।

ফেলিলাম ঝারিখানি দূরে—

ভগবান্ নিও প্রতিশোধ—

নয়নে আসিল জল পূরে,

ক্ষোভে কণ্ঠ হ'য়ে আসে রোধ !

সহসা হেরিলু দেহ টলে,

মাথা ঘুরে বসিলু ভূতলে,—

রুধির প্রবাহ বেড়ে চলে—

সারা বিশ্ব উঠে যেন তুলি'

তারিণী ফুকারি' কঁাদে শুনি,—

তার পরে গেলু সব তুলি' !

হ'ল যবে প্রথম চেতনা

মাথার উপরে পটি বাঁধা—

সারা গায়ে হ'য়েছে বেদনা

কোথা আছি লাগিতেছে ধাঁধা !

চাহিতে সাহস নাহি মনে

কি জানি কি হেরিব নয়নে !

ভাবি কাল সকালে কেমনে

আবার আনিব ফুল তুলি' !

ক্ষতশিরে করি অনুভব

তারিণীর কোমল অঙ্গুলি ।



রূপ-কথা

:::

রাখাল ছেলে খেলে ফিরিত বনে বনে,
রাজার মেয়ে চেয়ে রহিত আনমনে,—

কাননে কত ফুল,—

কোয়েলা, বুলবুল,—

বাতাসে ছলছল

নবীন-পল্লব ;

নিঝর ঝঞ্ঝারে,

কূজনে, ছঞ্ঝারে

উঠিছে চারিধারে

মুক্তি-কলরব ;

খেলিছে মৃগশিশু, ময়ুরী নাচে তালে ;—

রাজার মেয়ে ভাবে রাখিয়া হাত গালে :—

“রাখাল ছেলে খেলে ফিরিছে নিজমনে
আমার মন কেন ঘুরিছে তারি সনে ?”—

২

রাখাল ছেলে খেলে দাঁড়াল আনমনে—

রাজার মেয়ে চেয়ে বসিয়া বাতায়নে,—

পড়িয়া রহে খেলা,

চাহিয়া বাড়ে বেলা

ভাবনা জুটে মেলা

মনের কোণে তার—

প্রাসাদে কত ঘর

খচিত মর্মর !—

উৎস ঝরঝর

ঝরিছে চারিধার—

টবেতে ছাঁটা ফুল খাঁচাতে পোষা পাখী !—

রাখাল ছেলে ভাবে গাছেতে ভর রাখি—

“রাজার মেয়ে চেয়ে বসিয়া বাতায়নে

আমার মন কেন বাঁধা সে তারি সনে” ।

৩

উপরে প্রজাপতি হাসিল প্রাণ ভ'রে,
অতনু বাঁকা ধনু ভরিল ফুলশরে ;—

কাননে ফুলগুলি
উঠিল ছলি' ছলি',
মুক্তি দিল খুলি

বাঁধনে শতদ্বার ;

প্রাসাদে মণি হাসে
ঝলকি' দীপ-হাসে,
বাঁধন নাগপাশে

মুক্তি পরে হার ;—

বাহিরে অন্দরে হোলো সে কোলাকুলি
মুক্তি দিল ধরা বন্ধ গেল খুলি'—

রাখাল ছেলে ফেলে আসিল খেলা তার,
রাজার মেয়ে ভাঙে প্রাসাদ-কারাগার !



অভিষেক

নূতন ঘরে আজকে রাণীর
 নূতন প্রতিষ্ঠান ;
 চারিধারে কি বন্দনা গান !
 আনন্দেতে ঢেউ খেলে যায় রাণীর বুকে—
 আনন্দেতে মুক্তা ঝরে গৌর মুখে—
 বিশ্বাধরে করছে খেলা তরুণ আভা—
 ডেকেছে ওই অরুণ আলোর বান !—
 নূতন ঘরে আজকে রাণীর
 নূতন প্রতিষ্ঠান ;—

কেউ এনেছে সারি শ্যামা, কেউ আনে ভীমরাজ—
 কেউ এনেছে অমল মুক্তাবারা—
 কেউ এনেছে সপ্তস্বর, কেউ বীণা এস্রাজ—
 কেউ এনেছে চিত্র ফুলের চারা ;—
 কি ভিড় ! কতই ঠেলাঠেলি সভাঘরে !
 কার উপহার উঠবে আগেই রাণীর করে ?—

রিক্ত হাতে দাঁড়িয়ে কবি ;—সবাই সুধায়-
কি, করিবে দান ?

কবি বলে—

‘একটি শুধু গান’ ।

ব্যঙ্গ ফুটে সকৌতুকে হাজার চোখে,—

হেসে ওঠে সভার লোকে—

নীরব কবি দাঁড়িয়ে রহে সভা কোণে

আপন মনে ।

সিংহাসনে দাঁড়িয়ে রাণী রতনে ঝলমল

সবার হাতে নিলেন উপহার ;

আশায় আশায় ব্যথিয়ে ওঠে নীরব সভাতল,

কি প্রতিদান ভাগ্যে আছে কার !

সবায় তুষি রাণী বসেন সিংহাসনে ;

শূন্য সভা এক নিমেষে তৃপ্ত মনে ;

মোনী কবি দাঁড়িয়ে তবু সভা কোণে ;—

রাণী সুধায় “কি চাও তুমি—

কি করেছ দান ?”

কবি কহে লজ্জানত মুখে—

“একটি গা’ব গান” !

সে গানে হয় নাই কামনা—শুধুই দেওয়া,-

আত্ম নিবেদন,—

সকল পরাণ সুরে উঠছে ঘিরে—

রাণীর সিংহাসন ;

হৃদয় যেন তরল হ'য়ে ফুটছে গানে,

আনন্দেতে ঝরছে রাণীর—প্রতিষ্ঠানে !

অবাক্ রাণী সে গান শুনে, পরশমণির

পরশ পেলে প্রাণ !

রাণী ভাবে “আজ্কে আমার নূতন ঘরে

সফল প্রতিষ্ঠান !”

সকল দেওয়া শেষ যে তখন অস্তমিত রবি,

রাণী ভাবে “কি করিব দান” ?

সিংহাসনের নিম্নে চাহি দাঁড়িয়ে তখন কবি

শুনায় শুধু একটি প্রাণের গান ।

নিজের করে গাঁথল মালা নিজেই রাণী,

মনে মনে কইল কতই সোহাগ-বাণী !

গানের শেষে ঝঙ্কারিয়া কঁকণ ছুটি—

মালা দিয়া বাড়াল তার মান ;

নূতন ঘরে ধন্য হ'ল রাণীর

নূতন প্রতিষ্ঠান !

এপারে

:::

নদী সেথা চলে খাসা
 কুল্ কুল্,
 ঝোপে ঝোপে বাঁধে বাসা
 বুল্ বুল্,
 নাই সের—নাই পোয়া,—
 বিনিমূলে দোয়া নোয়া,—
 চারিধার ধোঁয়া ধোঁয়া—
 ভুল ভুল !
 এ পারে তরুণ কবি
 করে বাস,
 পরাণে অরুণ রবি,
 মুখে হাস—
 চোখে তার সুর আঁটা,—
 কিছু নাই তাল কাটা,—
 মনে হয় চোর কাঁটা
 ফুল ফুল !
 নদী ছুটে,—নাই ভাঁটা-
 কুল্ কুল্ !

ওপারে বুড়ার দল
 সাবধান,
 গণিতে সে করতল
 খরসান,
 ফুলে মধু কত ফোঁটা—
 কাঁটাহীন কিনা বোঁটা—
 খুঁজে চোখে গোটা গোটা
 জুল জুল !
 নদীর থামেনি ছোঁটা
 কুল্ কুল্ !

ক্ষাপারা বসিয়া ছিল
 আনমন !
 কবির ইসারা দিল
 জাগরণ,—
 প্রাণের কবার্ট খোলা,—
 আগুপিছু সব ভোলা
 হৃদয়ে লাগিল দোলা
 তুল তুল !
 নদী ছুটে বুক ফোলা
 কুল্ কুল্ !

বুড়ার আঁকুটি রেখা

মিছে হয় !

কেতাব হিসাব লেখা

ভেসে যায় !

সাদা মেঘে চাঁদ ভাসে,

কাঁটায় গোলাপ হাসে,

গান মুখে ক'রে আসে

চুল চুল ?

নদী ছুই কূল নাশে

কূল্ কূল্ !



শেফালির অবতরণ

∴∴

সেদিন উষাকালে আকাশ ভ'রে
 উড়ে ঘন মেঘ পিঙ্গল,-
 নামিছে বর্ষা মঙ্গল
 স্তম্ভ নগরীতে জ্বলিছে দীপ
 তখনো ভবনে ভবনে,
 মত্ত হাহারবে কঁাদিয়া যায়
 বাদল ভাদর গগনে,
 তখনো বাসা ছাড়ি' উড়েনি পাখী
 তুলে নাই কল সঙ্গীত,
 পূর্বদিক্ দিয়ে সেই সে সবে
 ফুটিছে অরুণ ইঙ্গিত,
 শেফালি বালিকা শঙ্কিত
 লজ্জা বিজড়িত বদনে কহে—
 “নামিব না আমি
 ক্ষমহ মোরে স্বামী” ।

২

কহিল ক্ষিতিল নীরব হাসে—

“বুঝনা নিপট নির্দয়

পরের বেদনা দক্ষয় ;

উতলা চঞ্চল হৃদয় ব্যথা

আঘাতে না তব বক্ষে ;

পরের দুখ হেরি করুণা বারি

গলে না নিষ্ঠুর চক্ষে ;

পিপাসা বুকে যার বুঝিতে পারে

সে কভু কি জ্বালা তৃষ্ণায়,—

চাতক বুঝে কভু নিদাঘ কালে,—

চকোর না পেলে জ্যোৎস্নায় ;

আয় বালা নেমে আয় আয়” ।

অমনি মাথা নাড়ি’ শেফালি কহে,—

“নামিব না আমি

ক্ষমহ মোরে স্বামী”—

৩

“কঠিন ক্ষিতিতল বাজিবে বুকে—
বাজিবে কঠোর প্রস্তর,—
মরণ নামিবে সত্বর।”

কহিল ক্ষিতিতল— “সিক্ত জলে
কোমল করেছি অঙ্ক”;
সুখাল শেফালিকা সজল দলে—
লাগিবে তা’হলে পঙ্ক” ?

আকাশে ঘোর হাসি বজ্ররবে
ছুটিল, কঁাপিল কন্দর,
ধাঁধিল দশদিক্ ক্ষণিকালোকে,
বিহগ চকিত-অস্তর,

কঁাপিল কানন প্রান্তর;
কহিল ক্ষিতিতল সপ্রতিভ,
“নাম লো বালিকা
নাম লো শেফালিকা,—

8

“বৃক্ষ শিরে রহি’ বৃথায় যাবে
 তব যৌবন-গৌরব
 শুকাবে কোমল সৌরভ” ।

হাসিল ফুলকলি,— “অনিল অলি
 যাবে কি ফিরিয়া কাননে ?
 জলদ জল, হায়, শীতল করে
 বুলাবে না কি এ আননে ?
 তারকা শশী রবি কাটিলে মেঘ
 হেরিবে না মানি’ বিস্ময় ?
 বৃথায় যাবে মম সুরভিভার
 কহিলে কেমনে মৃন্ময় ?

হায়, মিছে তব সংশয় !
জননী বুকে রহি সে সুখ তব
সহেনা কি স্বামী ?
নামিব নাহি আমি” ।

৫

নীরব ক্ষণকাল রহিয়া কহে
 ক্ষিতিতল মৃদু সুস্বর
 “শুন বালা দেহ নশ্বর,
 কি কাজে দিবে বল যদি না দিলে
 দেবতার পূজা লাগিয়া ?
 সাধনা এত তব, এত যে তপ
 সঞ্চিত নিশি জাগিয়া
 কি ফল যদি, হায়, বিফলে যায় ?
 নাম লো, কি কাজ লজ্জায় ?”
 শুনিয়া ফুলবালা নামিবে কি না
 ভাবিতে কাঁপিয়া মজ্জায়
 ছলিল বৃন্ত-শয্যায় ;
 অমনি দশদিকে ফুকারে পাখী
 নিবে দীপশিখা ;
 • ঝরিল শেফালিকা ।



নীরবে রহিল চেয়ে

∴∴∴

তখন সাঁঝের বাতি জ্বলিয়া উঠেছে ঘরে,
কুলায়ে পশেছে সুখে পাখী তরু শাখা প'রে,
আঁধারে ভূতের মত দাঁড়ায়ে বিটপি-দল,
বেড়ার আড়ালে ঝাঁঝি করিতেছে কোলাহল,
মাঠে মাঠে থামিয়াছে রাখালের বেগুরব,
ফিরিয়াছে গোষ্ঠ হ'তে তৃণতৃপ্ত ধেনু সব,
অভিমানিনীর কাছে তখন গিয়াছি ধৈয়ে ;
সে শুধু আমার পানে নীরবে রহিল চেয়ে ।

বিদ্রোহী নয়নে তার ফুটিয়া উঠেনি ক্রমা,
চাপা ছুটি ওষ্ঠে তবে মহারোষ ছিল জমা,
আমারে হেরিয়া দ্বারে বিজলী খেলিল চোখে,
উন্নত নাসার অগ্রে দর্প ফুটে সে আলোকে,
তখন তাহার কাছে করুণে বিরহ গাহি'
দাঁড়ায়েছি অবিচল সুচির বিদায় চাহি' ;
তখন নদীর বাঁকে তরণী চলেছে বেয়ে ;
সে শুধু আমার পানে নীরবে রহিল চেয়ে ।

ফিরেছি বিরাগ ভরে বহি' বুকে গুরুচাপ,
 হেরেছি বদনে তার ফুটিয়াছে অনুতাপ,
 উদ্ধত তাহার শির নমিয়া প'ড়েছে ধারে,
 আকুল বুকের ব্যথা বাতাসে কঁাদিয়া ফিরে ।
 সাঁঝের গগনে তবে হাসিল তারার দল,
 প্রতিবিশ্ব ল'য়ে বুকে বহিল নদীর জল,
 মাথার উপরে গেল নিশাচর গান গেয়ে ;
 সে শুধু আমার পানে নীরবে রহিল চেয়ে ।

যখন পথের বাঁকে মিলাল আমার ছায়া,
 আঁধার রজনী ধীরে বিছাল ঘুমের মায়া,
 যখন বুকের মাঝে ভেঙ্গে গেল সব আশা,
 তখনো মুখেতে তার ফুটেনি একটি ভাষা ;
 বহিল মৃদুল মন্দ তবে নৈশ সমীরণ ;
 সূদূরে ছলিল সুখ হিল্লোলে পিয়াল বন,
 ঘুমালো বিশ্বের প্রাণী সে মধু পবন পেয়ে ;
 সে শুধু পথের পানে নীরবে রহিল চেয়ে ।



কল্পনা

:::

হে মম মানসী দেবী কল্পনা সুন্দরী
 কবে কোন শুভ লগ্নে মর্ত্যে অবতরি
 কোন উচ্চলোক হ'তে হ'ল পরিচয়
 তোমাতে আমাতে সখি ? ভুলিবার নয়
 সে দিনের মধুগীতি কূজন গুঞ্জন
 বকুল কলিকা ঘিরি' উঠিল যখন,
 যখন সে গিরিনদী কলনাদ ক'রে
 বাহিরিল দ্রুত পদে মধুর নিব্বারে,
 রজনী গন্ধার গন্ধে হ'য়ে আমোদিত
 সন্ধ্যা যবে এল নামি' ; পাপিয়া-কূজিত
 যখন নামিল বিশ্বে নৈশ অন্ধকার,—
 প্রদানিল পরিচয় প্রথম তোমার ।

তোমার পরশ পেয়ে বুঝিলাম মনে
 ভাষা আছে তটিনীর মধুর নিকণে,
 কত অশ্রু, কত হাসি, আলাপ কোতুক
 দুর্দাম হঠতা কত, কত দুঃখ সুখ

নিত্য চলে ভেসে ; চূত মুকুলের শির
মিলন বিরহ কত অগোচরে ফিরে ;
পুণ্যের রচেছ স্বৰ্গ—পাপে দেছ সাজা,
রাজারে করেছ ভিক্ষু—ভিক্ষুরে সে রাজা !

তুমি বাজায়েছ বীণা ; শুনেছি মোহিত
যুগান্তরগত গাথা ;—নূপুর শিঞ্জিত
সহস্র বর্ষের পরে আসিছে ভাসিয়া
ধীরে ধীরে ;—হেরিতেছি পান্ডুজনপ্রিয়া
চরণে অলঙ্করাগ, লীলাপদ্য করে ;
কজ্জল মলিন চোখে বাতায়ন পরে
বসি' বসি' কান্তের উদ্দেশে তন্দ্রালসা ;
হেনকালে দ্বারদেশে পথিক সহসা
করে করাঘাত শুনি' উঠে দ্রুতগতি,
অপ্রস্তুত চোখে জাগে বিনীত মিনতি !
অথবা সে বিরহিণী বিরহের 'তাপে
সম্ভাপিত দীর্ঘ দিবা ক্লিষ্টনিশা যাপে,
পদ্যপত্রে লিখি স্বীয় কাহিনী করুণ
পাঠায় প্রিয়ের কাছে—রচনা নিপুণ—
উত্তরের প্রতিকায় রহে আনমনা—
আকাশে বাদল নামে—বুঝা সে সাস্তনা ।

এইরূপে দেখায়েছ দেখি নাই যাহা
 শুনায়েছ সে সঙ্গীত যা ক'খনো, আহা,
 শুনি নাই ; যুগে যুগে নব বেশ ধরি'
 হইয়াছ উপনীত ; গিয়াছি পাশরি'

তোমার করুণাময়ী অসংখ্য মূরতি,
 জানিনা কেমনে আজি করিব আরতি !
 হৃদয় কানন শূন্য ; বেলা, শেফালিকা
 নাই সেথা, কিসে তব গাঁথিব মালিকা ?

ভূমিষ্ট হইলু যবে, চকিত চঞ্চল
 যবে বিশ্বজগতের ক্লিষ্ট কোলাহল
 সমুদ্রগর্জ্জন সম পশিল শ্রবণে,
 শীত বায়ু রূঢ়ভাবে অঙ্গপরশনে
 কাঁপাইল সচোজাত আমার বয়ান,
 প্রথম আলোকে যবে ধাঁধিল নয়ান,
 যখন ক্ষিতির গন্ধ পশিল প্রথম
 নাসিকায় তীব্রভাবে, ছিলনা সম্ভ্রম
 হস্ত পদ সঞ্চালনে, অবাধ স্বাধীন
 ছিলাম কাটিত তবু যবে নিশিদিন

পরমুখ চেয়ে, জগতের বাক্যরাশি
 একান্ত অবোধ্য ছিল যবে, কান্নাহাসি
 অকারণ, কি যে ছিল জানি নাই যবে
 দুঃখ সুখ, জননীর মূর্তি ধরি' তবে
 নিলে কোলে তুলে, করাইলে স্তন্যপান,
 শিয়রে প্রদানি' হাত গুঞ্জরিয়া গান

পাড়াইলে ঘুম ; আকাশের তারাগুলি
 নিদ্রিত শিশুর পানে চাহি' মুখ তুলি'
 নেহারি' গৌরবময় তোমার বদন
 কি ভাবিল ? তার পর হ'লে জাগরণ
 कहিলে কতই সুখ সোহাগের কথা
 শিশু আমি বুঝি নাই সে সব বারতা ;
 অক্লান্ত হৃদয়ে তুমি করেছ সহন
 শিরে শত অত্যাচার দুঃখ অগণন,
 দাওনি লাগিতে আঁচ শিশুর শরীরে ;
 সংসারের রোদ্র বৃষ্টি হ'তে ধীরে ধীরে
 ক্ষুদ্র পক্ষপুট দিয়া ঢেকেছ তনয়ে ;
 বহেছিলে কত স্নেহ তোমার হৃদয়ে

জানি নাই, বুঝি নাই ধ্রুবতারা সম
 চাহিয়া রজনী দিবা মুখপানে মম
 কত সুখ উপজিত তব ! লয়ে বুকে
 পরম আনন্দ ভরে অসহ কৌতুকে
 যত কিছু শুভ ইচ্ছা সুমঙ্গল বাণী
 কেবল আমার শীর্ষে প্রদানিতে আনি' ।

তার পরে নিজ মনে ল'য়ে মাটি ঢেলা
 শৈশবে একদা যবে করিতেছি খেলা,
 অকস্মাৎ ফিরে দেখি অতি চুপে চুপে
 আসিয়াছ পার্শ্বে মম সোদরার রূপে ;
 কপালে দিতেছ ফোঁটা, যমের দুয়ারে
 কাঁটা দিয়া দীর্ঘজীবী করিছ ভ্রাতারে
 বর্ষে বর্ষে দ্বিতীয়ায় ; নিঃস্বার্থ তোমার
 বাঞ্ছা দেবাশিষ সম নামিছে ভ্রাতার
 শিরে শিরে ; শৈশবের একমাত্র সাথী
 হে কল্পনে, জাগিয়াছ সারা দিবারাতি
 আমার খেলার ঘর সাজাবার তরে,
 দিয়াছ বিবাহ পুতুলের কন্যাবরে,

কোথায় রাজার বাড়ী করেছ নির্দেশ
 চিলের ছাদের কোণে, উত্তর প্রদেশ
 লক্ষ্য করি' চলে মেঘ—বুভুক্ষুর ক্ষুধা
 মিটাইতে শালপত্রে, কোথা রয়ে সুধা
 কোন বৃক্ষতলে, তব অনুগ্রহে বটে
 অজ্ঞাত ছিল না কিছু আমার নিকটে ।

একদিন যৌবনের প্রথম বিকাশে
 প্রেয়সীর রূপ ধরি' দাঁড়াইলে পাশে—
 কনক কঙ্কণ হ'তে উঠিল কিঙ্কিনী—
 • চরণে বাজিল মৃদু নূপুর-শিঞ্জিনী ;—
 তরুশাখা হ'তে সুখে কপোত যুগল
 মিলনের কলরবে করে কোলাহল,
 খঞ্জন আবরি ধরা নাচিয়া বিহরে,
 চক্রবাকী রজনীর দ্বিতীয় প্রহরে
 অসহ্য বিরহক্লেশে কঁাদে অনিবার
 প্রিয়-সন্তাষণ-রাশি গুনিয়া তোমার ;
 চন্দ্রালোক পড়ে তরু-বীথিকার শিরে,
 কুমুদ উঠেছে ফুটি' সরসীর নীরে,
 মন্দ সমীরণ বহে, তুমি কাছে কাছে
 ফিরিছ ছায়ার মত ; কণে' মম বাজে

তব সোহাগের বাণী ; রোমাঞ্চিত দেহে
 রুদ্ধকণ্ঠে তব মুখ পানে মুগ্ধ স্নেহে
 চেয়ে থাকি লুপ্ত আঁখি, তুমি হে কল্যাণি,
 পুষ্পশয্যা রচ মম বাসরের রাণি,
 শিখাও প্রেমের মন্ত্র ; দুটি প্রাণে প্রাণে
 একাকার, হে কল্পনে, তোমারি কল্যাণে ।

তার পরে একদিন কন্যারূপ
 আসিলে বার্কক্যে মম গৃহ আলো করি,
 দিয়া তব ভীত ক্ষুদ্র কোমল অন্তর—
 ছুটালে পাষণ প্রাণে করুণ নিব্বার ;
 সেইদিন দুটি চক্ষু লয়ে জলভার
 হেরিলাম অয়ি শুভে পূর্ণতা তোমার ;—
 ক্ষুদ্র কণ্ঠে শুনিলাম বিশ্বের সঙ্গীত,
 দেখিলাম ক্ষুদ্র চোখে জ্যোতিঃ বিকশিত,
 ক্ষুদ্র দেহে বিশ্বরূপ উথলিয়া উঠে,
 ক্ষুদ্র প্রাণে বিশ্বের চেতনা বুঝি ফুটে !
 বৎসলতা ভরে তার মুখখানি চুমি'
 বুঝিলাম, দেবি, কত লীলাময়ী তুমি

অবশেষে একদিন জীবনের শিখা
 নির্বাপিত হবে যবে, মৃত্যু কুহেলিকা
 বিশ্বের আলোক রাশি ফেলিবে ঢাকিয়া,
 শকুন মাথার কাছে যাইবে ঢাকিয়া,
 রূপ রস স্বাদ গন্ধ যাবে মুছে যবে
 কোন্ মূর্তি ধরি তুমি দেখা দিবে তবে ?
 তখন কি শুচিস্থিতা, হে কল্পনা-রাগি,
 প্রচারি গন্তীর কণ্ঠে আদেশের বাণী
 ঘুচাইয়া জীবনের দীর্ঘ অলীকতা
 উদিবে হৃদয়-রাজ্যে জীবন দেবতা
 সত্যরূপে ? তখন কি শান্তি-মূর্তি
 সৌম্যমুখে শিখাইবে সুপথ বিস্মরি'

ভ্রান্ত পথিকের মত ভ্রমেছি কেমন ?

তখন কি করি' দিয়া ভ্রম-সংশোধন

দেখাবে মুরতি তব মহানন্দময়,

রহিব নিস্তরু মনে মানিয়া বিস্ময়

ক্ষণকাল, ঘুচে যাবে ভেদ, এক হৃদয়ে

দাঁড়াইব বিশ্ব মাঝে আমরা উভয়ে।



ডাক তারে

-:-:-

ডাক্ তোরা তারে—‘আয়’ ;
 সে যে সুখনিশা শেষে : গেল হেসে হেসে
 সে যে ফিরিল না পুনরায় ;
 সে যে ভেঙে গেল আশ দিয়ে হা-হতাশ
 শুধু রেখে গেল আঁখিজল,
 ওগো ছিল যাহা মনে রয়ে গেছে মনে
 কভু জানাতে পারেনি তায় ;
 সে কি ফিরিবে না ব’লে গিয়াছিল চ’লে,
 আহা এত ছিল মনে তার !
 সে যে বড় দিল ফাঁকি, কি রাখিল বাকি
 দীন আমাদের তরে, হায় !



জল কেন আঁখি কোণে ?

আজি জল কেন আঁখি কোণে ?
 কে যেন গো নাই থেকে থেকে তাঁ
 বাজিছে ব্যাকুল মনে ;
 থামিয়াছে আজি কার বীণাখানি
 নীরব আজিকে কি অমিয় বাণী
 ছেড়ে কোন শাখী কোন্ প্রিয় পাখী
 গেল উড়ে কোন্ বনে !
 আজি জল কেন আঁখি কোণে ?

দূর অচলের কোলে ধীরে ধীরে
 তটিনী বহিবে যবে,
 কোন্ প্রিয়তম তরে নতশিরে
 বিষাদ বসিয়া রবে !
 কোমল চরণ অবধান ভরে
 ফেলিবে, কহিবে কথা মৃদুস্বরে !
 একি সংস্কার ! হায় হতভাগা,
 মৃত কভু ধ্বনি শোনে ?

আজি জল কেন আঁখি কোণে ?

জানি আমি বটে মিছে আঁখিজল
 মরণ শোনে না কথা ;
 না শুনিয়া কার কল কোলাহল
 প্রাণে তবু বাজে ব্যথা !
 যে তুমি কহিছ ভুলিতে তাহারে
 তোমারি নয়ন সিক্ত আসারে—
 রয়েছ শুষ্কমুখে চেয়ে তুমি
 আকাশে শূন্য মনে ;
 আজি জল কেন আঁখি কোণে ?
 নীরব আজিকে যে সুরব বীণা
 স্মৃতিটুকু তার ভুলিতে পারি না !
 নাই সে যে নাই—থেকে থেকে তাই
 বাজিছে ব্যাকুল মনে ।



উৎকণ্ঠিতা

∴∴∴

কেন আসিলনা—আসিলনা কেন ?

আসিল আসিল ওই !

বার বার মনে বুঝাই গোপনে

তবু সে আসিল কই ?

সূর্য্য ঢলিয়া পড়িল গগনে,

কাজ সারি' সবে ভবনে,

একাকিনী শুধু আমি বাতায়নে

আনমনে চেয়ে রই ;

কমল মুদিল আঁখি ছুটি তার

অলি সে ফিরিল কুলায়ে,

কপোত কূজন করে নিজ নীড়ে

কপোতীর মন ভুলায়ে ;

দিবা অবসান—পাখী খুঁজে বাসা

মাঠ হ'তে ঘরে ফিরে এল চাষা ;

কত সাধ মনে—কত মনে আশা

কার কাছে তাহা কই ?

বার বার মনে বুঝাই গোপনে
প্রিয় বুঝি আসে ওই !

যত পড়ে বেলা—আঁধারের মেলা—
তত বাড়ে উৎকণ্ঠা ;
দূরে নদীতীরে—শিব-মন্দিরে
বাজিছে আরতি ঘণ্টা ;
তরু মর্শ্বরে চমকিয়া মরি,
স্বাপদের পদ ধ্বনিতে শিহরি,
অনিমেঘ আঁখি জলে উঠে ভ'রি'
তাড়াতাড়ি মুছে লই ;
বার বার মনে বুঝাই গোপনে
ওই প্রিয় আসে ওই !

চারিধার হ'তে পবনের স্রোতে
মধুর মদির মন্ড্রে
সন্ধ্যার প্রিয় পূরবী রাগিণী
পশিছে কর্ণ রঞ্জে ;
জনহীন পথ নীরব নিথর—

গণিতেছি বসি' অতীত প্রহর,
 কৌমুদী জলে নিশা সরোবর
 সুখে করে থই থই ;
 এত আকুলতা আমার পরাণে
 কই—প্রিয় আসে কই ?



এ পথে এলনা ফিরে

এই পথ দিয়ে গেলো—এপথে এলনা ফিরে—
 রেখে গেল স্মৃতিটুকু ব্যাকুল নয়ন নীরে !
 এইখান হ'তে তারে বহি' নিল নানা যানে
 নিয়ে গেল কতদূরে কতদূর ব্যবধানে !
 দূরে ছিল রুগ্মদেহ—মন ছিল আশে পাশে—
 দিন দিন ব্যগ্র লিপি সে কথাটি পরকাশে !
 আজ তারে বাষ্পাকারে বহি' কোন বাষ্পপোতে
 আশা নিরাশার পারে কে ভাসাল কাল স্রোতে ?
 দেখিতে পাবনা তারে জীবনের এই তীরে ?
 যে পথে সে গিয়েছিল—সে পথে এলনা ফিরে !

এই পথ দিয়ে গেলো—এ পথে এলনা আর !
 দেখিল না চোখে হেথা কত রুদ্ধ হাহাকার !
 অবোধ বালক চাহে সকলের মুখপানে,
 সকলে সান্ত্বনা কহে বুঝেনা তাহার মনে !
 হায় সচো মাতৃহারা—হায়রে অভাগা ছেলে
 স্তব্ধ হয়ে ব'সে আছ আপনার খেলা ফেলে !—

মা যবে বিদেশ যায় কাঁদিয়া আকুল প্রাণ
বুঝিতে পারে না আজ কতদূর ব্যবধান !
আজ রাখে পথপানে ভীতিকুণ্ঠ আঁখিটিরে—
এই পথ দিয়ে গেলো—এ পথে এলনা ফিরে !

এই পথ দিয়ে গেলো—এলনা ফিরে এ পথে !
রেখে গেলো স্মৃতিটুকু কত ব্যর্থ মনোরথে !
কত সুখ—কত দুঃখ—কত তার ভগ্নদেহ
অপরের তরে তবু একটানা শুধু স্নেহ !
মূর্ত্তি ধরি' ছিল গেহে শুধু করুণার রাশি—
শুধু সেবা—শুধু দান—স্বরগের পুণ্যহাসি !
আজ মনে পড়ে প্রতিদিনের ঘটনা সব—
আজ তার সব শেষ—আজ মিছে কলরব !—
সে দিন পশিল গেহে—মনে পড়ে বধুবেশ,—
আজ কতকাল গত ! পাকিল সকল কেশ !—
আজ তার ভরা ঘর—কোথা লক্ষ্মী গেল ধীরে ?
এই পথ দিয়ে গেলো—এ পথে এলনা ফিরে !



আমার বনের মুক্ত হরিণটিরে

—:~:—

আমার বনের মুক্ত হরিণটিরে

কে বিঁধিল—কে বিঁধিল শরে !

সঙ্কুচিত—চাইছে ফিরে ফিরে

শম্প কবল পড়ছে মুখে ঝরে !

আনন্দ নাই চোখের চাহনীতে,

চরণ নেচে উঠেনা ভঙ্গীতে,

মৌন ব্যথায় স্তব্ধ চকিত চিতে

মন্ত্রিত ক্লান্ত তনুর ভরে !

চেয়ে চেয়ে ক্লিষ্ট কাহার মুখে

ছন্দোদোতুল আনতে গেল হাসি

ব্যথা নিবিড় নিরীহ কৌতুকে

রইল বুকে রক্ত অশোক রাশি !

অহিংস সে হ'লনা কার মনে ?

দারুণ ব্যথা দিল অকারণে—

বনের অশোক রইল পড়ি' বনে

আনন্দ তার লুটায় ধুলির' পরে !



শ্রীমতীশ চন্দ্র ঘটকের মহাপ্রয়াণে

∴∴∴

শৈশবের সাথী মোর—হে আমার প্রিয়,
 শোননি করুণ ডাক্ ‘দিও সাড়া দিও’
 অনন্তের যাত্রাপথে? বাজে নি কি ব্যথা
 ছাড়িতে মোদের সভা? আজ তুমি কোথা?
 উৎকর্ণ উৎকণ্ঠ প্রাণ চাতকের মত
 তৃষার্ত তোমার আশে তাকায় সতত।

হে সুকণ্ঠ আজ তব উঠিবে না বাণী
 আমাদের গৃহাঙ্গণে? সেই মুখখানি
 চিরপরিচিত ঘুরে যাবে না কি ঘরে?
 সেই নিরমল হাসি কোতুকের ভরে
 আবার দিবেনা দেখা? হে শান্ত হে প্রিয়
 চির নিমীলিত তব নয়ন অমিয়?

শৈশবের সাথী মোর—যৌবনের সখা
 বার্ককে ভরসা ছিল আঁখির তারকা।

আজ ঘন অন্ধকারে ঢাকিয়া আকাশ
 চলিলে কোথায় তুমি ?—জাগে মনে ত্রাস !
 কূলঙ্ঘ্য নদীতীরে আকুল পথিক
 যেই দৃঢ় তটভূমি আঁকড়ি নির্ভীক
 দাঁড়ায় বিশ্বস্ত মনে—সে পড়িলে ধ'সে
 নির্বাক্ বিহ্বল যথা থাকে চেয়ে ব'সে—
 মোদের তেমনি ভাব তোমার অভাবে ।
 সে সাহস—সে উৎসাহ মন কোথা পাবে
 প্রতিপদে তুমি যাহা দেছ অনিবার
 যোগাইতে ভারতীর পূজার সস্তার ?

হে বাণীর বরপুত্র একাগ্র সাধক
 সুরসিক এনেছিলে হাসির ঝলক্
 রোদন-বহুল সন্ধ্যা—পদ্ম রাশি সম
 বেদনার অশ্রুজলে শান্ত নিরুপম
 ফুটে ছিল রঙ্গ-ব্যঙ্গ ; নাই কি হে আর
 মুছিতে নয়ন-জলে সে শক্তি তোমার ?
 মেল ভাই চোখ্ মেল—একি নিদ্রাবেশ !
 একি মৌন বধিরতা ! কাঁদে সারাদেশ !

হে তাপস হে সুযন্ত্রী ভাবিতে পারি না
 বিফল তোমার আজি মধু-তন্দ্রী বীণা !
 মনে হয় এই বুঝি উঠিবে বাজিয়া !
 নীরবতা ভাষে ভাই—ভেঙে যায় হিয়া !
 রস শুধু, যশঃ নহে তোমার সাধনা,—
 তা' দিয়ে আবার দেশে আনো উন্মাদনা ।

না না ভাই কর ভোগ অর্জিত বিশ্রাম,
 সহিয়াছ এজীবনে ক্লান্তি অবিরাম
 আজ সে বিরতি হোক তার । শিরে তব
 চামর ঢুলাকু ধীরে নিত্য অভিনব
 অনন্তের দেশ হ'তে সুরভি পবনে,—
 সাগর সঙ্গীত সুর তুলুক শ্রবণে,—
 মুখপানে চেয়ে থাকু বৃদ্ধ হিমালয়,—
 ঘুমাও সে ঘুম যাহা ভাঙিবার নয় ।
 সাগর-কপোত কেঁদে যাকু কলরবে
 'কোথা তুমি ? কোথা তুমি ? কোথা তুমি ?' ৩



সমাপ্ত

